



# Wantok

Niuspepa Bilong Yumi Ol PNG Stret!

K1 tasol

Namba 2147 Novemba 5 - 11, 2015 28 pes



**Laipstail**  
 Kilim dai nating manmeri oil i sutim tok olsem em sanguma mas stop nau!  
**P14 - 15**

Givim olgeta Famili na Poroman or Poromeri wanpela naispela **KRISMAS** kad long dispela yia!

Ful kala na traipela print antap long olgeta glosi kad wantaim ol envelop

## K2.20

lon wanwan sais (A6) pepa  
 Oda mak inap long 100 kopi tasol  
 \*Wanpela singel kala wol or piksa tasol, ino wantaim grafik disain\*  
 • A6 105mm x 145mm

Only at... **THEODIST LTD**  
 THE STATIONERY SUPERMARKET  
 WAIGANI DRIVE, POM PH: 313 9800 MARKHAM ROAD, LAE PH: 472 5488  
 printquotepom@theodist.com.pg printquotela@theodist.com.pg



**Nupela kampani bilong mekim klos i kam long PNG - P10 Meri nius**

# K14.2 bilien baset bilong 2016

NESENEL Baset bilong Papua Niugini long yia 2016 bai K14.2088 bilien, Tresera Patrick Pruaitch i tok.

**Aja Potabe i raitim**

Long Tude apinun, Palamen i tok orait long dispela baset taim 84 memba i wanbel na vot na 12 memba i vot egensim.

Taim Praitim Minista Peter O'Neill na ol 83 memba i wanbel long Tresera Pruaitch i kamapim dispela mani plen bilong neks yia, Oposisen Lida Don Polye wantaim arapela 12 memba i no wanbel long dispela baset.

"Mi laik tok tenkyu long Tresera Pruaitch i kamapim dispela baset na skelim mani gut long gavman sekta long larim kantri bilong yumi i muv yet maski prais bilong gol, wel na ges i go daun na tu kantri na pipel i kisim taim long El Nino," Mista O'Neill i tok.

Tasol Mista Polye i tok, "Mipela inap long toktok moa long dispela baset tasol olsem wanem na ol memba long gavman sait i hariap tru long oraitim dispela baset. Ol i noken giamanim pipel." Mista Pruaitch i tok

dispela baset em i sot long K2.0297 bilien o K2.0297 bilien defisit.

Total mani gavman i bin kisim long ol binis, takis na helpim i kam long ol arapela dono ejensi na foren gavman long yia 2015 em i sanap olsem K12. 1791 bilien.

Gavman i katim na skelim dispela mani long ranim kantri long yia 2016 taim kantri i bungim tupela bikpela hevi, Mista Pruaitch i tok.

"Dispela tupela bikpela birua em i El Nino o drai sisen na prais bilong gol, ges na wel i go daun long inter-nesenel maket," Mista Pruaitch i tok.

Baset bilong las yia em bin stap long K16 bilien tasol nau i go daun long K14 bilien bikos drai taim prais bilong gol, ges na wel i go daun, PNG i mekim liklik mani na em i sot long K2 bilien.

Mista Pruaitch i tok gavman i luksave long ol namba wan eria we em i laikim kirapim na dispela ol eria we gavman i luksave na givim mani em ol:

*I go moa long pes 2...*



**Brukim het...**

**TINGITING GUT:** Aron Shem, wanpela bilong ol gret 8 sumatin bilong Bomana Demonstresen Praitimeri Skul i putim het go long eksam bilong em taim tisa bilong em Ms Haru i raun long sekim ol. Planti bilong ol gret 8 sumatin insait long Papua Niugini i sindaun long fainal eksam bilong ol long kisim ples long gret 9 long neks yia. *Poto Nicky Bernard.*



**No charges to call customer care from the friendlier network**

Switch to bmobile-vodafone at a store near you.

76003555

www.bmobile.com.pg

Supporting PNG MADE

Connect with us on f t

bmobile | vodafone

# Gavman i no senis

Palamen nus  
wantaim Aja Potabe



**PLANTI manmeri long kantri i bin ting Oposisen bai senisim gavman tasol dispela i no bin kamap las wik taim ol memba i bin holim miting long Palamen Haus.**

Long las wik Trinde apinun, Oposisen i bin givim notis bilong kamapim vot i no gat bilip egensim Praim Minista Peter O'Neill, tasol ekting Palamen Spika Aide Ganasi i tok i gat tupela asua i stap long dispela notis pepa.

Mista Ganasi i tok fom na sabstans bilong dispela notis pepa bilong kirapim vot ov no konfidens egensim Praim Minista O'Neill i no stap stret.

Oposisen Lida Don Polye na ol memba bilong Oposisen i tok ol bai stretim gen dispela liklik asua i stap long notis pepa na givim i go bek gen long han bilong Ekting Palamen Spika Aide Ganasi bikos praime minista i wok long mekim planti nogut samting long bagaram-pim dispela kantri na Oposisen i

laikim em long raus.

Long Fonde monin, gavman i holim wanpela vot i gat bilip long Praim Minista Peter O'Neill. Namba bilong ol memba husat i gat strongpela bilip o konfidens long larim Mista O'Neill i kamap praime minista i sanap olsem 78.

Ol narapela memba bilong Oposisen i wokabaut i go ausait taim ol gavman i kamapim dispela vot i gat bilip long plua bilong Palamen.

Oro Gavana Gary Juffa na Memba bilong Goilala William Samb tasol i stap long vot egensim dispela vot i gat bilip long praime minister.

Bihain long dispela vot i gat bilip, Praim Minista O'Neill i tok tenkyu long ol memba husat i stap long gavman na sapotim gavman long kamapim stabiliti.

Mista O'Neill i tok Oposisen i mas putim gutpela sindaun bilong pipel i go pas bipo long ol i mekim kainkain toktok na kainain samting long kirapim instabiliti long kantri.

"Gavman bilong mipela i gat gutpela trek rekot long givim sevis i go



**Praim Minista O'Neill i sanap wantaim ol sinia minista na pati lida bilong kolisen patna las wik Fonde long soim olsem gavman i stap strong.**

bek long ol pipel na dispela i tru tumas bikos ol planti lida bilong pipel o ol memba long palamen i soim sapot long dispela gavman long larim em i wok go het,"O'Neill i tok bihain long Palamen siting las wik Fonde.

"Mipela i wok long kamapim moa wok mani bilong ol manmeri. Mipela i wok long putim planti pikinini long skul, ol haus sik i wok long kisim fri medikel sevis, lo na oda asua i wok long go daun na rot na bris bilong kantri i wok long

kirap." "Em i klia olsem dispela gavman bai kisim bek sia bilong praime minista long yia 2017 bikos em i no mekim tok promis nating.

Em i tok promis na em i givim i go bek long ol pipel,"Mista O'Neill i tok.

## Palamen i tok orait long rifom bilong kapitol maket

PALAMEN i pasim tripela Bil we taim em i kamap lo bai i senisim na groim Kapitol Maket long Papua Niugini.

Minista bilong Tred, Komes na Industri Richard Maru i givim; ol Sekyuriti Komisnin Bil 2015, Kapitol Maket Bil 2015 na Sentral Dipositori Bil 2015 long las wik Trinde.

Minista i tok save long palamen olsem tripela bil bai i kamapim ol sekyuriti komisnin bilong PNG olsem wanpela independen fanding we palamen bai luksave na senisim Pot Mosbi Stok Eksens na kapitol maket.

Minista Maru i tok inap long 1996 rifom, benking sekta i gro tasol dispela i no bin wankain long kapitol

maket sekta.

'Stok lista i gro inap 19, ol dispela ektiviti long namba bilong ol pipel i save baim stok, no gat nupela investmen edvaisa, na administresen na planti moa,' Minista Maru i tok.

Nupela lo bai senis long husat bai lukautim Pot Mosbi Stok Eksens. Na tu em bai givim bikipela pawa long ol Sekyuriti Komisnin long painim aut na kotim husat i brukim lo bilong ol askim insait long tripela lejislesen.

Long dispela nupela lejislesen bai wanpela namba wan ogenaisesen bai kontrolim kapitol maket long luksave olsem wok i kamap gut na tru na kotim

husat i brukim lo insait long kantri.

Yunit Tras na Menesmen Invesmen Skim olsem olpela invesmen Kopresen Fan nau em Pasifik Balens Fan bai kam aninit long lukaut bilong nupela ol Sekyuriti Komisnin bilong PNG aninit long ol Sekyuriti Komisnin Ekt 2015.

'Mipela i laik sapotim planti pipel bilong PNG long developim ol save long ol sekyuriti na ol indastri long helpim mipela groim dispela sekta long givim mani bilong longpela taim na givim sans bilong invesmen long ol pipel na ol institusen investa. Dispela gro bai kamapim planti wok bilong ol pipel tu,' Minista Maru i tok.



**Treseri Seketeri Dairi Vele, Tresera Patrick Pruaitch na Nesanel Plening Minista Charles Abel i kam aut long bset lok ap long Tunde dispela wik.**

## Sovren welt fan bai kamap neks yia

TRESERA Patrick Pruaitch i tok Sovren Welt Fan (SWF) bilong PNG bai kamap neks yia, 2016. Em i mekim dispela toktok asde taim em i toktok long nesanel baset bilong kantri.

Mista Pruaitch i tok stat long neks yia namba wan kwata, ol mani gavman bai kisim long ges, wel, gol na ol arapela risos bai i go insait long SWF.

"Mi amamas long tokim yupela olsem ol mani gavman bai kisim long ol risos projek bilong kantri bai go insait stret long Sovren Welt Fan stat long neks yia namba wan kwata,"Mista Pruaitch i tok.

SWF bai gat tupela liklik fan ol i kolim Stebilasesen Fan na Sevings Fan. Mista Pruaitch i tok gavman bai yusim ol mani i stap insait long Stebilasesen Fan long kamapim ol nesanel baset bilong yia 2017 na ol arapela yia long bihain taim.

Mista Pruaitch i tok Palamen i kamapim pinis lo bilong SWF long mun Julai long dispela yia long kirapim opis bilong PNG SWF we ol bikipela saveman na ol man husat i gat klinpela rekot long kantri bai kamap bod ov dairekta bilong lukautim SWF.

"Mi laik tok tenkyu long olgeta memba bilong Palamen i vot long kamapim dispela lo. Dispela SWF bai kamap olsem wanpela long tem invesmen bilong dispela kantri na ol pipel long bihain taim.

"Taim prais bilong gol, ges, kopa na ol arapela risos i go daun long intensenel maket, PNG i ken kisim mani long SWF na sapotim nesanel baset bilong kantri.

"Gavman i givim mani pinis long kirapim opis bilong SWF na stat long neks yia, ol man husat i gat gutpela nem, ekspirens na save bai wok long PNG SWF Seketeriat,"Mista Pruaitch i tok.

## K14.2 bilien baset bilong 2016

**I kam long pes 1...**

- 22 Provins i kisim K3.6620 bilien, na em i makim 26 pesen bilong total baset. Dispela em i bikipela mani we Gavman i katim na givim long ol 22 provins. Aninit long ol dispela, K890 milien bai go long 89 distrik olsem DSIP mani, K220 bai go long PSIP mani bilong 22 provins, K55.5 milein Distrik Sapot Gren na K13.3 milien Spesel Sapot Gren.
- Edministresen sekta i kisim K2.5458 bilien na dispela i makim 18 pesen bilong total baset we K80

- milien bai go long 2018 APEC miting na K50 milien long helpim ol manmeri husat i kisim taim long El Nino.
- Helt sekta i kisim K1.56 bilien, na em i makim 11 pesen bilong baset we dispela mani bai go long fri helt ke program na bai kirapim ol haus sik;
- Edukesen sekta i kisim K1.3 bilien na em i makim 9 pesen bilong baset. Dispela i karamapim K606 milien bilong fri edukesen program na long kirapim ol tisa trenning kolis;

- Lo na Oda Sekta i kisim K1.24 bilien na dispela i makim 8.7 pesen bilong baset we sampela bilong mani bilong dispela bai go long kirapim polis na difens fos;
- Rot, Bris na Trensport Sekta i kisim K1.25 bilien na dispela i makim 8.8 pesen bilong baset. Em long kirapim nupela rot, mekim mentenens long ol rot, bris, ples balus na sip bris long kirapim bisnis, stretim sindaun bilong komyuniti na kamapim ikononik developmen.
- Ikononik Sekta i kisim

- K610 milien;
- SME Sekta i kisim K61 milien na Nesanel Developmen Benk bai lukautim dispela mani;
- Turisim Infrastraksa i kisim K50 milien;
- Ikononik na Treid Infrastraksa i kisim K71.9 milien. Sampela bilong dispela mani bai go long ol Marin Industrial senta na Ikononik Jon.
- Egrikalsa Komesel Ekwiti Fan i kisim K100 milien; na
- Rurel Empawamen aninit long DSIP na PSIP i kisim K1.2 bilien

# Oposisen givim gen mosen bilong vot i no gat bilip

**OPOISEN i stretim gen na givim pinis notis bilong kirapim mosen na vot i no gat bilip egensim Praim Minista Peter O'Neill long Tunde Novemba 3.**

Ekting Palamen Spika Aide Ganasi i kisim pinis dispela notis na bihain long 7-pela de Oposisen Lida Don Polye bai muvim wampela mosen long senisim praim minista.

Praim Minista Peter O'Neill wantaim olgeta gavman minista na memba i bin kamapim wampela vot i gat bilip long praim minista las wik Fonde taim ol i harim olsem Oposisen i givim notis bilong senisim praim minista.

Ol 72 memba i bin soim vot i gat bilip long praim minista las wik tasol Mista Polye wantaim ol memba bilong Oposisen i salensim gen Praim Minista O'Neill long soim dispela strong bilong en neks wik taim Palamen i sindaun gen.

"Lida bilong gavman bisnis na praim minista i no ken skruim palamen i go long narapela de long abrusim dispela vot i no gat bilip egensim praim minista.

"Gavman i gat namba na praim minista i noken pret. Larim dispela namba i sapotim em gen long plua bilong Palamen," Mista Polye i tok.

Deputi Oposisen Lida Sam Basil i bin muvim dispela mosen na Is Sepik Gavana Sir Michael Somare i bin sekenim long kamapim dispela vot i no gat bilip egensim Praim Minista O'Neill.

Mista Polye i tok mosen bilong ol long rausim praim minista i bin gat sampela asua las wik tasol ol i stretim gen dispela na givim i go bek long opis bilong Palamen Spika.

"Olgeta samting mipela i stretim gen pinis na em nau mosen i stap pinis long han bilong ekting Spika bilong Palamen Haus.

"Tasol Oposisen i pret nogut gavman i skruim sindaun bilong palamen i go long narapela de bikos long abrusim dispela vot i no gat bilip long praim minista.

"Mi salensim lida bilong gavman bisnis James Marape na ekting Spika Aide Ganasi long no ken skruim sindaun bilong palamen. Larim pasin bilong demokrasi i kamap long kantri na bai yumi lukim sapos gavman i gat tru tru namba long sapotim praim minista i holim dispela sia," Mista Polye i tok.

Oposisen i tok moa long 17 memba i sainim dispela mosen pinis na tupela memba bilong PNC pati bilong praim minista tu i sainim dispela mosen.

"Palamen i mas sindaun long bungim dispela 63 de ol siting de long kalenda bilong en. Sapos lida bilong gavman bisnis o ekting Palamen Spika i skruim palamen i go moa long narapela wik gen, tupela man bai asua long brukim lo. Oposisen bai kotim tupela aninit long kontem ov kot," Mista Polye i tok.

Tasol Mista O'Neill i tok em i les long lukim dispela kain giaman politiks Oposisen i wok long mekim.

"I gat planti gutpela samting Oposisen na gavman wantaim i ken bungim tingting long mekim. Kantri i wok long bungim bikipela El Nino birua na mipela gavman na oposisen wantaim i mas wokbung long sevim laip bilong ol manmeri bilong dispela kantri husat i ksiim bikipela taim long dispela drai sisen birua," Mista O'Neill i tok.

Mista O'Neill i tok we ol memba na pipel bilong dispela kantri i gat strongpela bilip long dispela gavman na PNC pati bikos ol i bin soim dispela sapot na bilip long yia 2012.

"Mi no save Oposisen i mekim wanem kain samting tru. Ol i laikim wanem samting na ol i wok long gaimanim ol pipel na mekim kain kain giaman toktok long pulim tingting bilong manmeri na hatim bel bilong ol.

"Ol pipel i laikim PNC pati long ranim dispela kantri. Olsem na long yia 2012 taim kantri i go long ileksen, ol pipel yet i votim planti ol PNC memba i kam insait long Palamen.

"Ol dispela PNC memba i wanbel na makim mi kamap praim minista bilong kantri. Mista Polye wantaim ol memba bilong THE Pati tu i bin bilip long mi kamap praim minista na ol i bin votim mi.

"Nau taim ol intenesenel komyuniti, ol dona ejensi, na ol foren investa i gat bikipela bilip tru long dispela gavman - gavman bilong O'Neill-Dion. Planti ol nupela biknem intenesenel kampani i wok long kam insait na inves long kantri bilong yumi.

"Oposisen i no ken bagarapim nem bilong dispela kantri na kamapim politikel instabiliti. Ol i no ken tingting long ol yet tasol long stap long politikel pawa.

"Ol i mas tingim gutpela sindaun bilong manmeri bilong dispela kantri. Na dispela gavman i wok long kirapim ol sevis long helpim sindaun bilong manmeri PNG," Mista O'Neill i tok.



Oposisen Lida Don Polye i holim kopi bilong mosen long kamapim vot i no gat bilip long Praim Minista Peter O'Neill taim Memba bilong Vanimo-Green Belden Namah i lukluk i stap.

# Thank you **BSP!**

**"BSP Home Loan** helped us to purchase our first house. Our son now has his own room. We have our own kitchen and a whole yard to host a family Kaikai."

**David Jonah**  
First Home Buyer



A range of home loan products for first home buyers and existing home owners.

 <b>FIRST HOME OWNERSHIP</b>	 <b>HOME LOAN</b>
1. Maximum Loan K400,000	1. Flexible Loan Amount
2. Interest Rate 4% pa	2. Interest Rate 8.45% pa
3. Maximum Term 40 years	3. Maximum Term 25 years
4. Equity 10%	4. Equity 30%



320 1212 / 7030 1212 - 24/7  
 servicebsp@bsp.com.pg  
 www.bsp.com.pg



# K50 milien bilong El Nino

**GAVMAN** bai givim K50 milien aninit draut o disasta rilif program. Taim kantri i kisim bikpela taim bikos ples i drai na manmeri i wok long kisim bikpela taim, gavman i sori long ol pipel na i givim K50 milien long helpim ol manmeri.

Dispela K50 milien i kam aninit long Edministresen sekta. Dispela

sekta i kisim K2.5458 bilien. Dispela em i makim 18 pesen bilong total nesenel baset bilong yia 2016 we Tresera Patrick Pruaitch i bin tokaut long Tunde moning.

“Edministresen sekta i kisim namba tu bikpela mani bihain long ol provinsal sekta i kisim bikpela mani tru,” Mista Pruaitch i tok.

Ol bikpela projek i kam aninit long

edministresen sekta em ol Lens na Hausing Program (K20 milien), Jeneral Ileksen (K10 milien), APEC Atoriti (K80 milien) we K35 milien bai go long ol nesenel ileksen na APEC sekyuriti bilong 2018 APEC bung, na K100 milien bilong Egrikalsa Komeselaisesen Ikwiti Fan (K100 milien).

Mani aninit long Edministresen

sekta tu bai karamapim ol gavman dipatmen (K81 milien), gavman opis rent (K200 milien), retrensment (K30 milien), Nasfan na ol Supafan bilong pablik sevan (K200 milien).

Sampela mani bilong retrensment o pinis pe mani ol pablik sevan i save kisim bai kam long Fainens na Treseri Dipatmen.

## Trenspot sekta kisim K1.2 bilien

O’NEILL-DION Gavman em i kamapim nupela rekot long PNG olsem em i gavman bilong kirapim ol nupela rot na trenspot infrastraksa insait long kantri.

Trenspot na rot infrastraksa olsem rot na bris bilong kar, ples balus na sip bris em ol sampela ki samting we gavman i wok long putim moa mani long en.

Long 2016 Nesenel Baset, gavman i givim K1.2541 bilien long kirapim dispela sekta. Dispela mani bai karamapim gavman fanding bilong Hailans Haiwe (K200 milien), Lae-Nadzab rot (K45 milien), Is-Wes Nu Briten Haiwe (K20 milien), ol Nesenel Haiwe (K70 milien) Lae Siti rot ap-gret (K10 milien) na Intenesenel Teminal apgret Pot Mosbi ples balus i kisim K10 milien.

Dispela mani i go long trenspot sekta i karamapim ol kauntapat fanding tu wantaim.



Nupela rot projek i kamap long Gerehu long Pot Mosbi. Foto: Nicky Bernard

## NNB i kisim K4.3 milien

NESENEL Nakotiks Biuro (NNB) i kisim K4.3 milien long 2016 nesenel baset tasol ol wok manmeri bilong dispela opis i no save sapos ol bai wok o nogat.

Ol baset pepa i luksave olsem NNB em i wanpela ki lo na jastis ejensi tasol dispela opis i bin pas las yia yet.

Sif Seketeri bilong Gavman Sir Manasupe Zurenuoc i bin tok Nesenel Es-kekyutiv Kaunsil (NEC) i rausim pinis pastaim dairekta jeneral na i tok long makim nupela man long bosim dispela gavman ejensi tasol i no kamap yet.

Long Tunde, Wantok Niuspepa i luksave olsem gavman i katim na skelim K4.3 milien long NNB. Nogat wanpela senis i kamap long dispela skel mani NNB i kisim.

Tasol NNB opis long daun taun Pot

Mosbi i pas. Sir Manasupe i tok nupela opis bilong NNB i stap long opis bilong en long Morauta haus.

Planti wok manmeri bilong NNB i stap nating na ol i stap long gavman peirol na kisim potnait mani nating.

Senia edukesen na awenes kodineta Lawrence Tau i tok em tasol i wok long mekim ol wok bilong NNB.

“Mi bin stap aninit long wanpela sot tem kontrak na mekim ol awenes wok bilong NNB long tokim ol yangpela manmeri long ol nogut samting bilong drak na hombriu.

“Tasol nau mi no stap long gavman peirol na mi save olsem ol arapela poroman bilong mi i stap yet long gavman peirol tasol ol i no save mekim wanpela wok bilong gavman,” Mista Tau i tok.

## Juffa: O’Neill i bagarapim kantri

ORO Gavana Gary Juffa i tok Praim Minista Peter O’Neill i wok long bagarapim kantri.

Gavana Juffa i tok Mista O’Neill i wok long bagarapim dispela kantri na ol pikinini bilong dispela kantri long bihain taim bai kisim bikpela hevi bilong sampela ol asua bilong O’Neill.

Mista Juffa i tok O’Neill i laik kamapim diktetasi gavman insait long PNG bikos em i wok long;

- brukim planti lo bilong kantri;
- kisim planti dinau mani ausait;
- mekim nambaut na i no menesim ikononi bilong kantri gut;
- paulim ol papagraun na kantri taim em i no tok stret long LNG mani;
- mekim planti ol paul pasin; na
- mekim ol arapela pasin nogut we praim minista i no inap long mekim.
- stopim ol loya long kam insait long kantri na harim kot;
- wok long rausim sampela ol senia pablik sevan husat i wokim stretpela wok;
- kontrolim midia na polisman;
- na kamapim planti ol samting we ol diktetasi o atoriterian gavman i save mekim.

“Sapos demokrasi em i wanpela man, bai yumi lukim olsem O’Neill i pasim maus bilong en, pasim ia bilong en, taitim han na



Gavana Juffa i sanap strong long pait bilong ol raits bilong pipel.

lek wantaim na kalabusim em,” Mista Juffa i mekim dispela tok piksa.

Em i tok O’Neill i wok long kilim dai spirit na pasin bilong demokrasi na dispela em i no gutpela pasin em i mekim.

Tasol Mista O’Neill i tok gavman bilong en i wok long kirapim planti gutpela samting we ol pipel i amamas long en.

“Mi laik tokim Oposisen long no ken mekim giaman politiks. Gavman i givim sevis long pipel. Fri edukesen, rot na bris, fri helt

sevis, lo na oda, ikononi divelopmen, na ol arapela sevis we ol pastaim gavman i no save givim long en, dispela gavman i wok long givim long pipel bilong yumi.

“Planti nupela rot i kamap. Nupela klasrum i kamap. Planti nupela foren investa i kam insait long kantri.

“Em ol gutpela samting dispela gavman i wok long mekim long senisim kantri bilong yumi,” Mista O’Neill i tok.

## Lihir i surukim opening bilong ol dai lida bilong bipo

Tony Sapan i raitim

PLEN long opim ol monumen long tingim ol lida bipo ol i bin helpim long divelopmen bilong sikspela lokal level Gavman insait long NTI Distrik stat long 1995, em ol i surukim bek i go bihain long sindaun bilong nesenel palamen.

Wok long ol dispela monumen i bin stat bipo long Kantri i makim 40 yia bilong en, i kos K20,000 wan wan i go het na klostu ol i pinisim.

Monumen bilong Lihir i stap long hetkora bilong Nimamar LLG long Postsiaga bai i tingim 21 lida bipo namel long ol tupela Presiden bipo na wanpela vais presiden bipo em olgeta i dai pinis.

## Kampani i no ripot long taim

RIPOT long we kampani bilong ol pipel bilong Lihir, Anitua Limited i wok long tripela yia stat long 2010 i go long 2012 ol i mekim ausait long faivpela mun, taim lo i karamapim wok bilong ol kampani i tok, ol i mas mekim.

Ol i brukim lo na dispela i rausim as tingting long mekim ol kain ripot olsem em ol i save tokaut long en insait long miting bilong ol se holda em ol i save holim sikspela mun bihain long pinis bilong yia.

Em i wok bilong ol dairekta long lukim olsem dispela kain ripot ol i mekim bipo long faivpela mun i pinis em lo i tok i mas kamap na sapos ol i no mekim inap ol i brukim lo na ol i ken kisim mekim save aninit long lo.

Dispela rong i namba faiv painimaut wanpela lain bilong Dipatmen bilong Treid, Komes na Industri i mekim taim ol i mekim wok painimaut i go insait long Bisnis Divelopmen, Saplaia na pasin bilong baim ol samting long Lihir Gol Main.

## Ol Saplaia bilong NML

WOK painimaut i go insait long bisnis divelopmen na saplaia na pasin bilong baim ol samting long Lihir Gol Main i painim olsem kampani i ranim main i mekim bisnis o baim ol samting i kam long 4, 301 kamapani long saplaia ol samting na sevis i go long en long namba 15 de bilong mun Julai dispela yia.

Long dispela namba, 1,951 long ol em ol kampani bilong Papua Niugini wantaim long ol 1,045 kampani bilong Lihir.

Ol i tokim lain i mekim dispela painimaut olsem bikpela hap long ol samting ol i baim long ol narapela kantri em bilong ol masin na kemikel em ol i no nap baim insait long PNG.

Dispela ol i tok klia long en long nambawan painim bilong dispela ripot em Dipatmen bilong Treid na Komes na Industri i mekim em nambawan bilong Lihir Gol Main na namabawan tu bilong wanpela risos projek insait long kantri.

# Benefits of MRI and CT scan

**MRI Scan (Magnetic Resonance Imaging) and CT scan (Computerised Tomography) both are two different types of imaging methods used by doctors to see inside your body.**

Both the techniques create high quality images of the entire internal structure of the body that is seen on a computer screen, helping doctors to understand the condition of your organs.

### CT Scan

A CT scanner uses X-ray beams for taking pictures. It can provide detailed information about the body, including the head (brain and its vessels, eyes, inner ear and sinuses), chest (heart and lungs), skeletal system (neck, shoulders and spine), pelvis and hips, reproductive systems, bladder and gastrointestinal tract.

### Doctors will ask for a CT scan

- To diagnose a muscle or bone disorder or look for tumours,
- A fracture or a blood clot.
- Bleeding in the brain, especially from an injury, can be seen better on a CT scan than an MRI.
- If you are in an accident, organ tear and injury, broken bones and spinal damage are seen more efficiently.
- Normally for any abdomen and pelvis scan, a CT is the benchmark over an MRI.

### MRI Scan

MRI scans use powerful magnetic fields and radio frequency pulses to produce detailed pictures of organs, soft tissues, bone and other internal body structures.

Differences between normal and abnormal tissue is often clearer on an MRI image than on a CT. There is no radiation involved in an MRI scan, it can be a noisy exam and takes longer than a CT.

### Doctors will ask for an MRI scan

- To see your tendons and ligaments'
- The spinal cord also can be seen better



A CT scanner uses X-ray beams for taking pictures. It can provide detailed information about the body. Photo: PIH Media

on an MRI image, since the density of these structures and tissues are more defined.

For women, inform your physician or the radiology technologist before any scans if there is any possibility you are pregnant.

The question of whether a CT scan is required or an MRI is needed depends upon what part of the body needs to be examined and why the examination is being carried out.

### Advantages for CT and MRI include

1. Faster scanning
2. Higher resolution images.
3. Decreased X-ray exposure. (The average CT scan today exposes patients to less radiation than what airline passengers receive on long flights.)
4. Non-invasive techniques
5. No hospitalisation

Talking about their separate benefits

MRI is performed to evaluate:

- Organs of the chest and abdomen—including the heart, liver, biliary tract, kid-

neys, spleen, bowel, pancreas and adrenal glands.

- Pelvic organs including the bladder and the reproductive organs such as the uterus and ovaries in females and the prostate gland in males.
- Blood vessels (including MR angiography).
- Lymph nodes.
- Causes of pelvic pain in women (e.g. fibroids, endometriosis)
- Suspected uterine abnormalities in women undergoing evaluation for infertility.
- Tumours of the chest, abdomen or pelvis.
- Malformations of the blood vessels and inflammation of the vessels (vasculitis).

A CT exam may be done in order to assess particularly when other types of examination, such as X-Ray, UGS or physical examination are not conclusive.

- Pinpoints the location of a tumour, infection or blood clot

- Guide procedures such as surgery, biopsy and radiation therapy
- Detect and monitor diseases and conditions such as cancer, heart disease, lung nodules and liver masses
- Monitor the effectiveness of certain treatments, such as cancer treatment
- Detect internal injuries and internal bleeding

If any question or doubt arises one should feel free to put it in front of the doctors.

### MRI also helps detect cancers in Men such as prostate cancers!

Until recently, most professionals have been sceptical that magnetic resonance imaging (MRI) could be used on a widespread basis to diagnose or stage prostate cancer with any degree of reliability, and therefore help with making treatment decisions.

One analysis of scientific literature published from 1984 to 2000 found that MRI was able to predict the stage of prostate cancer accurately anywhere from 50% to 92% of the time, depending on the facility and the skill of the radiologist. Actual detection of tumours also depended largely on the skill and experience of the radiologist.

But MRI technology has substantially improved in the past few years, and some experts believe it may be time to reevaluate its use in guiding treatment decisions.

A new generation of MRI devices and additional technological advances (contrast enhancement and special processing) are being used together — in select imaging centres — to generate amazingly clear images of the prostate.

In these images, even tiny areas of cancer can be revealed in colour, enabling radiologists to determine exactly where a tumour is located in the prostate gland.

If any question or doubt arises one should feel free to put it in front of the doctors. To set-up an appointment to meet our doctors at PIH call 79988000. We are currently offering 20% discount on MRI till 22<sup>nd</sup> November 2015. Call 70296170 for more details on the offer.

**SUFFERING FROM JOINT PAINS, HEADACHES OR BACK PAIN, BUT DON'T KNOW THE EXACT CAUSE? HAVE YOU BEEN ADVISED AN MRI SCAN BY YOUR DOCTOR?**

**NOW, YOU DON'T HAVE TO TRAVEL OVERSEAS!**

**CELEBRATING ONE YEAR OF THE COUNTRY'S ONLY MRI FACILITY!!**

*200 MRI scans done since inception in 2014.*

MRI is a non-invasive diagnostic test that uses strong magnetic field and radio frequency waves to see inside your body.

What can it do for you?

- Find disease or abnormal conditions

- Find tumours
- Study brain and spinal cord imaging
- Study joint disorders, such as arthritis
- Detect problems in heart or blood vessels
- Detect sports injuries



# NCC i sainim luksave wantaim Korea long kalsarel heritej

**LUKAUTIM na promotim kalsarel heritej bilong Papua Niugini i go het i pulim luksave bilong ol intanesenel kalsarel ogenaesen.**

Wanpela bilong ol dispela ogenaesen em Intanesenel Infomesen na Netwoking Senta bilong Intanjibel Kalsarel Heritej (ICH-CAP) long Esia Pasifik rijnon aninit. Em i kisim sapot na lukaut bilong UNESCO.

Eksekutiv Dairekta bilong Nesenel Kalsarel Komisn (NCC), Dokta Jacob Simet na Dairekta Jenerel bilong ICH-CAP, Kwon Huh i sainim wanpela memorandum bilong andasstanding (MoU) long Korea long Oktoba 29 long dispela yia.

Dokta Simet i sainim

dispela agrimen taim em i stap insait long wanpela 3 de bung long Intanjibel Kalsarel Heritej (ICH).

Dispela memorandum namel long NCC na ICHCAP i lukluk long givim moa wok bung namel long tupela ogenaesen long bildim wanpela datables bilong ol meteriel i klostu long ICH long PNG. Dispela bai mekim isi long ol pablik long lukim.

Saining na bung i bihainim ol toktok i bin kamap long Septemba long Pot Mosbi namel long ol pipel i makim NCC na ICHCAP taim ol i stap insait long taim bilong opim nupela buk Traditional Knowledge and Wisdom: Themes from the Pacific Islands we ICHCAP i bin pablisim.



Dokta Simet na Mista Huh i soim ol pepa wok tupela i sainim. Foto: Dokta Don Niles

## Mis Pasifik Balens Fan i redi long resis

LONG 'lusim wanpela ples pastaim we ol i bin stap' em long putim moa veliu, Abigail Havora husat i gat 24 krismas i tok. Pasifik Balens Fan i sponsa long em long go insait long Mis Pasifik Ailan Pejen (MPIP) PNG long dispela yia.

Abigail i bin pinisim skul long en olsem Sains (Baioloji-Kemistri) greduet long yunivesiti bilong Papua Niugini (UPNG), na em i save wok wantaim bikipela oil na ges kampani long PNG, Oil Search. Em i bin joinim kampani long 2014 aninit long Greduet Developmen Program.

Abigail i tok, 'Mi gat laik long mekim senis i kamap we i bikipela toktok stret tasol em wanpela samting we i pusim mi long mekim ol samting. Dispela laik pasin i save gat bikipela senis long bilip bilong mi em 'long lusim ples gut pastaim bihain long yu kamap'.

'Mi traim long yusim dispela long ol toktok mi save tok, ol presentesen mi save givim, ol wok mi save mekim, ol wok mi save kamapim, ol projek mi save karim aut; olsem dispela pejen,' Mis Havora i tok.

Em i tok as bilong laik pasin bilong en i stat long save long em yet na painim aut wanem wok em laik mekim; dispela i kamapim strong na i pusim em long abrusim mak bilong en.

Long wankain taim, Siameri bilong MPIP PNG



Mis Pasifik Balens Fan wantaim mama bilong en, Misis Helen Havora.

Komiti, Katherine Johnston i tok tenkyu long Pasifik Balens Fan long sapotim MPIP long dispela yia long sponsa long wanpela kontesten.

'Pejen i no hap bilong ol givim sans long ol yangpela meri long kamap olsem kalsarel embeseda bilong kantri bilong ol tasol em i bilong mekim mani long bilong skolasip long helpim ol yangpela sumatin meri long pinisim

edukesen bilong ol inap long teseri institusen na ol kolis long kantri,' Mis Johnston i tok.

Long las 4-pela yia, MPIP PNG i mekim K400, 000 moa skolasip mani long sapotim 110 yangpela meri long PNG long pinisim skul bilong ol.

Mis Johnston i tok ol i no inap mekim dispela tasol bikos long sapot bilong ol gutpela sponsa, ol inap long mekim kamap.

## Gavana Jeneral i kamap orait bihain long operesen

GAVANA Jenera bilong Papua Niugini, H.E. GrenSif, Sir Michael Ogio, GCL, GCMG, KStJ, i bin go long ovasis long las mun long kisim hat operesen long Raffles Haussik long Singapore.

Wanpela toksave i kam long gavman haus las wik i tok olsem Sir Michael i bin kisim wanpela baipas hat operesen na nau em i wok long kamap orait long haussik,

Opisel Seketeri bilong em, Tipu Vuatha husat i bin go wantaim Gavana Jeneral long Singapore i kambek pinis long kantri, na i tok operesen i bin go gut na Sir Michael i stap orait long haussik yet.



Gavana Jeneral bilong Papua Niugini, Gren Sif, Sir Michael Ogio.

Gren Sif Sir Michael i bin traim long kisim helpim long ol haussik long Pot Mosbi, tasol ol dokta i bin salim em long go ovasis.

Mista Vuatha i tok, Gavana Jeneral i stap long ai bilong ol dokta long dispela taim long ol i wok long sekim wok bilong hat na bodi bilong em yet. Em i tok, i luk olsem Gavana Jeneral bai kambek long kantri long dispela mun yet.

Spika bilong Nesenel Palamen, Theo Zurenuoc i stap ekting Gavana Jeneral na em bai mekim dispela wok yet inap long taim Gavana Jeneralbai kamap orait na kambek long opis.

## ADB i sapotim trening bilong ol tisa

OLSEM 47 tisa long 5-pela konstraksen trening senta i greduet wantaim Diploma II program long sivil, elektrikel na mekikel enjineri long Indonesia Stet Politeknik long Malang (POLINEMA) i go pas long en.

Dispela tisa trening i kamap olsem hap bilong Mid-Level Skills Trening Projek we Esien Developmen Benk (ADB) na gavman bilong Timor-Leste.

'Timor-Leste i go pas long vokesenel tisa trening we POLINEMA i kamapim ol modul. Long dispela bai ol i no inap long salim ol tisa i go autsait long kantri long mekim gut long wok tisa,' Prinsipel bilong Sosal Developmen Speselis long Pasifik



Konstraksen tisa wantaim ol sumatin.

Dipatmen bilong ADB, Sunhwa Lee i tok.

POLINEMA em bikipela teknikel institusen na save givim trening bilong ol enjinia program long Sautis Esia.

Dispela Diploma II kos i kamap long skul yet, na wanpela kos bai ol tisa i ken mekim wok bilong ol na long wankain taim mekim gut long tisa wok bilong ol.

Dispela tisa trening bai givim ol yangpela sumatin long gat gutpela rot long kisim kwaliti konstraksen skill na givim ol strongpela tingting long wok.



Ol sumatin i putim ol Go Grin siot bilong ol na redi long klin ap.

# Go Grin klinim skul i stat gen

**BENK Saut Pasifik (BSP) bai kamapim wanpela bikpela Go Grin klinap we bai olsem handret sumatin long Papua Niugini na 5-pela Pasifik ailan kantri bai stap insait long en.**

BSP Anuel Go Grin klin-ap bai kamap long Fraide Novemba 13 long

dispela yia. Dispela klin-ap bai kamap long olgeta provins we ol BSP brens i stap na long sampela hap long Fiji, Solomon Ailan, Cook Ailan, Samoa na Tonga.

Ol sumatin bai stap insait bai kisim skul toktok long bikpela wok bilong envairomen na ol rot long lukautim. Bihain long dis-

pela skul toktok bai ol sumatin i klinim ol skul bilong ol. Ol komyuniti i ken joinim ol skul i rejista.

Ol tisa, papamama, ol memba bilong komyuniti i ken helpim long klinim envairomen, mekim em grin na helti long tisim na mekim wok bai ol pikinini i bihainim.

Long 2010, BSP i kirapim dispela Enuel Go

Grin ivent long PNG, Fiji na Solomon Ailan na 2015 ol i go moa yet long Cook Ailan, Samoa na Tonga.

BSP i go pas long dispela gutpela wok na givim ol rabis beg, han glap, siot, kep, han ben na ol stika. Het tok bilong dispela yia em 'Our Place, Our Planet, Our Responsibility'.

## Strongpela veliu i kamap olsem ol strit nem

DIWAIN Wot Yunivesiti (DWU) i givim ol nupela nem bilong ol strit long mekim ol komyuniti i bilip long ol strongpela veliu na bihainim ol.

Presiden bilong DWU, Pater Jan Czuba i tok long taim bilong senisim Sumatin Representativ Kaunsil (SRC) seremoni na ol i blesim na opim ol strit nem long SVD Memorial Auditorium long Mande.

Em i toktok long ol sumatin representativ kaunsil i go olsem laip ausait long skul i olsem

wanpela strit o rot.

Pater Czuba i tok olsem laip i pulap wantaim ol salens na yusim ol dispela strongpela veliu ol i kisim long DWU bai i soim ol rot i go painim wok bilong ol insait long laip.

Em i givim skul long ol sumatin long gat strongpela tingting na kamapim senis long komyuniti, haus na wokples long wanem ol strongpela veliu bilong DWU em yunivesel na ol i ken yusim long narapela hap tu.

Pater Czuba i tokim ol long no ken paulim ol veliu bilong ol, tasol gat strong long mekim ol senis, ol senis bai i kamapim rispek long ol narapela bikos long wanem ol i velium.

Kain pasin i save stap wantaim SRC Presiden Peterson Tom Isifu. Mista Isifu i amamas long wok bilong DWU long promotim sosel risponsibiliti insait long komyuniti na stap yet long ol stended bilong integriti long rilesensip wantaim ol narapela.

Em i tok ol sumatin i go aut i amamas long kamap inap nau wantaim sapot bilong ol woklain na edministresen long ol program we ol sumatin lida i ogenaisim.

Wanpela bilong ol kain sapot em long nupela web pes bilong ol we ol i opim long aste.

Long wankain taim, Dairekta bilong Human Risos Pater Garret Roche na Vais Presiden Akedemik Profesa Pamela Norman i blesim na opim dispela projek.



Pater Garry na Mista Alau i toktok fran long nupela ol strit nem.

## Eitpela man i greduet long embroidery

ETPELA man i greduet bihain long wanpela wik bilong lainim Samap na Embroideri Woksop long las Fraide.

Dispela woksop i bin kamap long Kedu Seif Haus long Milen Be na ol i bin lukluk long bungim ol wok bilong ol man na meri.

Taun meya na petron bilong Kedu Seif Haus long Milen Be, Gita Elliot, i amamas long 8-pela man long kam aut na stap insait long woksop.

"Kisim wanem samting yupela i lainim long hia na yusim long haus, no ken lusim long hia na go," em i tokim ol.

Elliot i tok Jenda Bes Vailens na Vailens Egens wimen i wanpela hevi we i go bikpela i no long ol komyuniti tasol long kantri na wol tu.

"Domestik Vailens em i no wanpela famili isu tasol em i hevi bilong pablik tu, taim yu lukim wanpela man i paitim meri bilong em, yu mas helpim bikos em i hevi bilong pablik," Mista Elliot i tok.



Wanpela man insait long dispela woksop.

Kodineta bilong Kedu Seif Haus, Didi Nipuega i tok olsem dispela woksop em i hap bilong Wap Program na Nesanel CIMC Famili na Seksuel Vailens Eksen

Komiti i givim mani long en. "Dispela em i namba wan olsem dispela woksop em i hap bilong Wap Program na Nesanel CIMC Famili na Seksuel Vailens Eksen

long provins," em i tok.

Nipuega i tok i bin gat olsem total bilong 18 pipel insait long dispela woksop na em i amamas long lukim 8-pela man i stap insait long

## Skolasip bilong ol sumatin i go antap

**Esther Bralyn Wani i raitim**

DIPATMEN bilong Haia Edukesen i apim skolasip bilong ol teseri sumatin long 9 200 i go long 11, 000 long neks yia.

Dispela senis bilong skolasip i go bikpela em bilong ol nupela sumatin na ol sumatin i stap pinis long ol teseri skul.

Planti hevi i kamap long ol teseri institusen, dipatmen i apim skolasip bai i helpim ol sumatin bihain wantaim 15, 000 skolasip.

Minista bilong Haia Edukesen na Risets Sains, Malakai Tabar na Profesa David Kavanamur i tok aut long dispela long las wik Tunde.

Long wankain taim, Minista Tabar i tok dispela ol skolasip i kamap wantaim bikpela mak long akedemik sait na sapos ol Gret 12 i laik go long yunivesiti na koles ol i mas skul strong long kisim skolasip. Em i mekim dispela tok

long wanem seleksen bilong ol Gret 12 bai kamap long Desemba.

Minista i tok planti bilong ol Gret 12 sumatin husat i ken go long ol yunivesiti i kisim gutpela Gret Poin Awerej (GPA) bai i no inap go insait bikos i nogat inap spes bilong olgeta.

"Mipela i laik askim olgeta Gret 12 sumatin long mekim gut eksem long kisim gutpela mak long go insait long yunivesiti," Minista Tabar i tok.

Em i tok planti bilong ol sumatin i save ting olsem em piknik o hap bilong wokabaut raun nating. Em i tok dispela i gat bikpela komitmen. Em i tok gavman na ol pipel i save baim takis i laikim yupela long pinisim gut skul bilong.

"Sapos yupela i no go insait long yunivesiti o koles long stretpela rot, bai em soim long namba wan semesta bilong yunivesiti taim ol i save feil," Minista Tabar i tok.

# Komisina Baki i givim tok long Oposisen long wok gut

## Bot i kapsait, Pasindia i orait

**POLIS Komisina, Gary Baki i go long opis bilong Oposisen Lida Don Polye long Mande long tok klia long ol paul tingting i kamap long wok bilong polis long dispela bung bilong Oposisen.**



**POLIS Komisina, Gary Baki**

Wanpela de bilong bung ol i no bin stretim tasol ol lain Oposisen i wet yet long go het long dispela bung.

Komisina Baki i tokim Oposisen olsem polis bai go het long mekim ikwal wok bilong ol long kain kain demonstresen, long luksave olsem wan-

bel pasin na siti bai stap gut.

Em i tok 700 polisman long Nesenel Kapitol Distrik (NCD) i no inap long bikpela siti na

long dispela Royal Papua Niugini Konstabulari (RPNGC) i save tingting long ol pablik i no inap stap gut long kain ol pablik bung insait long siti.

Long bung bilong Mista Baki em i tok ol i no bin putim long ol media gut na long sosai media tu long eksen bilong ol polis.

NCDC Pis na Gud Oda Komiti i no bin givim tok orait long dispela bung bilong ol NGO long wanem ol polis i stopim long banisim ol pipel i save painim trabel long no

ken yusim dispela sans long mekim trabel.

Em i tok ol polis i gat konstitusenel wok long lukautim na kamapim wanbel pasin long ol pipel insait long siti.

Oposisen i laik yusim Sir John Guise Stedium long bung, tasol ol i mas kisim tok orait long NCDC gavana pas-taim.

Komisina Baki i tok em i no gat tupela tingting long dispela bikos em bai helpim ol polis long kontrolim planti pipel go insait na kam aut long stedium.

**Tony Sapan i raitim**

FOAPELA pasindia i ran long banana bot namel long Lamassa na Lambom ailan insait long Wod 11 na 12 long Konoagil LLG i no bin kisim bagarap bihain long bot ol i ran long en i bungim bikpela solwara na i daunim em.

Dispela hevi i kamap long poin Waom bihain long bot i ran i go insait long bikpela solwara em i kapsait na daunim em wantaim olgeta kago, ol samting bilong wokim haus

na ol pasindia wantaim op-ereta na masin bilong em.

Dispela banana bot em i gat 40 HP autbot moto i wanpela long 7-pela Provinsal siaman bilong In-frastraksa na presiden bilong Konoagil LLG Mr. James Pandi, i bin givim i go long sampela wod insait long LLG.

Ol pasindia na banana bot i no kisim bagarap, tasol masin bilong em i slip aninit long samting olsem 200 mita long solwara long poin Waom.

## Nesenel Kot rausim kot bilong NFS bos

LONG Fonde 22 Oktoba, Nesenel Kot i bin rausim kot bilong pastaim Menesing Dairekta bilong Nesenel Fores Sevis (NFS) Kanawi Pouru.

Jastis Ellenas Batari i rausim dispela keis bihain long Pablik Prsekuta Pondros Kaluwin i givim wanpela toktok, Nolle Prosequi we hap bilong en i tok olsem: "stet bai i no inap long kotim yet Mista Pouru bihain long ol i kotim em long de 21 Oktoba, 2015".

Dispela disisen i kamap bihain long Pablik Proseskuta i harim toktok bilong loiya bilong Mista Pouru, Ian Molloy long Fonde 7 Oktobe, 2015 we i bin tok olsem ol kot pepa i no bin kamapim ol evidens bilong rong Mista Pouru i mekim

Long namel bilong Janueri 1, 2012 na Desemba 31, 2014, ol i bin kotim Mista Pouru, taim em i bin stap Menesing Dairekta, na em i no bin sakim tok long stopim timba operesen laisens namba PNGFLA/688/10 bilong Delta Timber Ltd.

Justice Batari i bin wanbel wanaim sabmisen bilong Mista Molloy na em i rausim dispela kot long Trinde, Oktoba 8, 2015. Long Oktoba 21, em i bihainim dispela na rausim olgeta sas bilong Mista Pouru na pasim dispela kot keis.

## Polis bai painim aut ol gan bilong polis



OL lida bilong tupela birua lain, Weia na Miok, long Enga husat i save stap long Pot Mosbi i bung wantaim Deputi Polis Komisina Opere-sens, Jim Andrews, na i wanbel long bel isi pasin. Ol lida i bin bung wantaim na sekan bihain long bung.

POLIS bai mekim wok painim aut long ol gan bilong gavman i stap aninit long

polis fos we ol i yusim long ol pait i kamap namel long ol traib long ol rurel eria.

Ekting Deputi Polis Komisina na Sif bilong Opere-sen, Jim Andrews, i gat bikpela wari long i gat ol tok-tok i stap olsem ol polis i givim ol gan long yusim long traibel pait i kamap long Enga provins.

Lida bilong wanpela traib i bin tokim Andrews na ol narapela senia polis opisal olsem ol i yusim 4-pela bikpela gan, M16 long kilim ol pipel long Enga.

Ol i klem olsem i gat tu-pela polisman long wanpela traib, long dispela tupela traib i pait, i go insait long dispela birua pasin i kamap na saplain ol gan na bulet.

Ol senia menesmen bilong Royel Papua Niugini Konstabulari bai mekim wok painim aut klostu taim long dispela kain pasin we ol polis i mekim na ol bai skulim ol dispela polis husat i stap insait long dispela pait.

Mista Andrews i tok, "Dispela toktok em i kamap bikpela pinis na mi bin givim instraksen long PPC Enga, Ekting Supaintenden George Kakas, long painim aut dispela man na givim gut skul toktok long em."

Ol lida bilong Weia, Miok, Tape, Youngolem na Lagaip sab klen bilong Mokol Traib i bung long Pot Mosbi long Novemba 1 long toktok long pis taim, ol i bin mekim ol dispela toktok long ai bilong

DCP Andrews na ol narapela senia opisal.

I gat 30 manmeri ol i bin kilim pinis na ol haus, wan-pela gavman stesen, wan-pela haus lotu na ol gaden kaikai i bin bagarap taim pait i kamap.

Dispela pait i laik kamap long Pot Mosbi tu, we ol man bilong tupela birua traib husat i save stap long Mosbi laik pait taim ol i bung.

Long pis mediesen ol i bin tok olsem tupela sif long viles long Weia sab klen em ol man bilong Miok traib i bin sutim ol long gan long Disemba 8, 2014.

Ol man Weia i bekim na kilim wanpela man long Miok traib na painim aut wanpela bilong ol gan we ol polis i bin givim long ol Miok man long las Disemba, 2015.

Ol lida nau i wok long kamapim pis namel long tu-pela birua traib, tasol Andrews i tok, tru pis i ken kamap sapos ol i givim ol gan i go long han bilong ol polis.

Tasol, ol lida bilong Enga i holim miting long Gren Papua Hotel long Pot Mosbi long kamapim pis na PPC Kakas i amamas long dispela.

"Nau mi gat bikpela amamas bikos mipela i kisim tu-pela birua traib i bung na wokim pis," PPC Kakas i tok.

## Baki i mekim klia long Oposisen



**Polis Komisina, Gary Baki, i tokim ol polis manmeri long wok aninit long komand na kontrol bilong ol komanda bilong ol long kipim pis insait long bikpela siti.**

POLIS Komisina, Gary Baki, i bin go long opis bilong Oposisen Lida, Don Polye, long kliaim sampela paol tingting ol pipel i gat long wok polis i bin mekim long stopim bung ol opesisen i laik makim.

Komisina Baki i bin tokim Oposisen olsem polis bai mekim wok bilong em yet long kipim pis long siti.

Em i bin tok moa olsem 700 manpawa bilong polis em i no inap long dispela bikpela siti, na long dispela as, Royel Papua Niugini Konstabulari i laikim ol pablik long ol i mas wok bung wantaim long kipim pis long siti.

"NCDC Pis na Gut Oda Komiti i no givim tok orait yet long ol NGO long holim pab-

lik bung, nogat. Long dispela as, polis i stap long stopim ol man husat i laik mekim kainkain toktok long dispela kain bung," Baki i tok.

"Konstabulari i gat wok long lukautim ol pipel na i save larim pis i stap we olgeta pipel i save laikim long en."

Oposisen lain i laik yusim

Sir John Guise Stedium long holim bung, tasol ol i ken kisim tok orait long Gavana bilong NCDC.

"Mi no gat wanpela tingting long dispela arenmen bikos dispela em bai redim wok bilong ol polis long kontrolim ol manmeri insait long Stedium," Baki i tok.



# EXXONMOBIL PNG givim ol medikal ikwipmen long Tari haus sik

MOA long 700 medikal saplai i kamap long Tari Haus sik olsem wanpela wok bilong bung inisativ namel long ExxonMobil PNG Limited (EMPNG), PNG Tribal Foundation, na Projek CURE.

Meri bilong Praim Minista, Ledi, Lynda Babao-O'Neill i bin stap long dispela taim wanpela ol bik-lain lng givim ol kontena wantaim ol saplai na ikwipmen bilong Tari Haus sik.

Tari Haus sik administresen i luksave long ol dis-

pela ikwipmen olsem ol bai helpim gu tru long ol heltkea nid bilong haus sik olsem jeneral sejeri pek, obstetric saplai, baiopsi nidel na kit, leb saplai kit, maikroskop, nebulaisa na ol pam.

Provinsal Dairekta bilong Tari Haus sik, Dokta Hewali Hamiya i tok amamas long dispela gutpela wok long taim bilong kisim ol dispela marasin saplai.

Em i tok pablik patnasip em i bikpela samting long Tari haus sik developmen

bai stap longpela taim.

"Mipela tok tenkyu long ExxonMobil PNG, bikpela Fes ledi, PNG Tribal Foundation naProject CURE long dispela bikpela done-sen we bai helpim Hela Komyuniti," Dokta Hamiya i tok.

Andrew Barry, EMPNG menesing dairekta, i tok helpim ol komyuniti long kamapim gutpela pablik helt na gat gutpela helti laip em i bikpela samting long EMPNG komyuniti invesmen program.

"Patnasip bilong mipela wantaim PNG Tribal Foundation na Project CURE bai helpim long strongim kepesiti bilong ol helt fasiliti long Papua Niugini we mipela i makim long helpim.

"ExxonMobil PNG i save sapotim planti program we i save helpim long kamapim strong helt kea kepesiti long komyuniti level, sapotim risets na divelopmen na awenes bilong ol bikpela helt wok long Papua Niugini," Mista Barry i tok.



EMPNG bringim ol medikal ikwipmen long Tari haus sik.

## Wok bilong ol meri, hop na salens long famili

WANPELA bikpela bung bilong ol Katolik sios long Rom long mun Oktoba i bin harim toktok bilong kainkain wok.

Sampela bikpela tok-tok i kamap long wanem wok ol meri i save mekim insait long famili, sosaiti na long sios senis bilong ol kalsa, ol bilip long marasin, sindaun bilong ol Kristen famili husat i kisim pesekusen na testimony bilong ol husat i stap insait long ol famili katekis.

Meri em i lewa bilong famili.

Nesenel presiden bilong Katolik Wimen Ogenaisesen long Nigeria, Agnes Offion Erogunaye i bin tokim ol Synod Pater olsem Afrika meri i gat nem long lukautim ol famili ol yet sampela taim wantaim man bilong ol na sampela taim ol yet. Em i tok Boko Haram insejensi long Nigeria i soim strong na wok bilong "wanpela meri na mama we i gat strong long holim strong famili long taim bilong hevi na bagarap," em i tok.

"Long lukluk bilong mi wantaim ol meri long dispela kain bikela taim bilong hevi, mi ken tok stret olsem maskim man i em het bilong famili, meri em i lewa bilong famili, na taim lewa i stop long wok, famili save dai bikos as bilong famili i sek sek na i no gat strong moa. Long Nigeria, Katolik meri i no bilong stap long haus tasol na lukautim famili.

Ol i kamap strongpela fos we bai sanap strong long spirit laip,

ikonomi na long wok bilong sios i go bikpela.

Sista Maureen Kelleher bilong Yunaitet Stets long Amerika i ritim wanpela hap tok long Instrumentum laboris we i tok olsem, "Sios i mas putim insait long ol famili, tingting bilong 'yumi' we bai ol i no lusim tingting long wanpela memba bilong famili. Olgeta memba bilong famili i mas kisim tok strong long kamapim ol skil na wokim ol pesonal plen bilong laip insait long sevis bilong Kingdom bilong God." Em i singaut long sios, "famili bilong mi,' long bihainim dispela toktok na strongim tingting bilong "yumi" insait long famili.

"Mi askim sios lida bilong mipela long luksave long hamas meri i harim singaut bilong mekim sevis long Kingdom bilong God tasol ol i no painim ples bilong ol yet insait long Sios.

Sampela i gat ol spesel save tasol ol i hat long kisim save bilong ol i go long ples bilong mekim ol disisen na long pastoral plening.

Ol i mas go long narapela hap we ol inap long givim sevis bilong ol long kirapim strong kingdom bilong God.

Long 1974, long Synod bilong Evanjelaisesen, wanpela bilong ol sista bilong mipela, Margaret Mary ol i bin makim em long kamap wanpela bilong ol nupela relijes sista we ol i makim long kamap olsem Yunien bilong Superia Jeneral.

Tude, 40 yia bihain, mipela i tripela tasol." Sista Kelleher i tok.

**EVERY HERO NEEDS A MAMA FLAME**

Mothers know it all starts with a full stomach.  
That's what gives their families the Strength & Energy to win.

**Flame**  
Plain Flour  
Strength & Energy



**Yut, Meri na  
Famili**  
Pastor  
**Barbara Lunge**

## Disisen bilong lida bai kamapim gutpela na nogut long bihain taim

HEVI bilong ol lida husat i save bagarapim ol gutpela samting bilong ol. Ol lida i mas was gut long wanem disisen yu mekim tude, gutpela o nogut bai bringim gutpela samting o samting nogut long ol pikinini man na meri long tumora.

Bai yumi ken tok olsem, wanem samting yu planim em bihain yu na ol pikinini na tumbuna lain bilong yu bai kisim kaikai bilong en, gutpela o nogut. Olgeta disisen we yumi mekim em i gat skel na jas i kam long bikpela kot bilong heven. Tok bilong God i tok long buk Gutpela Sindaun, "Sapos man i mangal long mani, na mekim kain kain pasin nogut bilong kisim, orait em i mekim trabel i kamap long famili bilong en. Tasol sapos man i no larim ol arapela man i givim mani long en bilong grisim em long mekim pasin i no stret, orait em bai i stap gut."

Ating yu wanpela politisen, o bisnis man o kaunsila o wanpela lida bilong komyuniti o wanpela man nating tasol? Yumi olgeta i save mekim ol disisen na olsem yumi mas was gut bilong wanem, nogut em bai karim kaikai nogut o inap karim gutpela kaikai we bai bringim senis gutpela o nogut long laip bilong famili bilong yumi. Yumi nidim tok stia bilong God long stiam na strongim ol disisen bilong yumi.

Tok bilong God i tok olsem yumi bai kisim planti gutpela tok stia long mekim gutpela disisen. "Sapos yu laik mekim sampela wok, orait pastaim yu mas kisim tingting long planti arapela man, na bai wok bilong yu i ken kamap gutpela sapos yu no mekim olsem, bai yu hatwok nating." Gutpela Sindaun 15:22 i tok.

Yumi, olsem ol lida i mas gat pret long God long em i mas bosim lewa na tingting bilong yumi long taim yumi mekim toktok na pasin. "Strepela man i save tingting gut pastaim, na bihain em i bekim tok long arapela man. Tasol taim man nogut i toktok, em i save mekim tok nogut tasol." Gutpela Sindaun 15:28.

Em i gat klia tok promis bilong blesing na kes o tok bilong bagarap i kam long God bilong ol stretpela man na ol man bilong mekim pasin nogut. "Man i no save bihainim tok bilong ol man nogut, na i no save wokabout long rot bilong ol man bilong mekim sin, na i no save sindaun wantaim ol man bilong tok bilas long God, dispela man i ken amamas tru. Dispela man i save laikim tumas lo bilong God, na em i save tingting long dispela lo long san na long nait. Dispela man i olsem diwai ol man i bin planim klostu long wara. Em i save karim kaikai long taim bilong em stret, na lip bilong en i no save drai. Olgeta samting em i mekim i save kamap gutpela. Ol man nogut i no olsem. Nogat tru. Ol i olsem skin rais win i save rausim i go. Olsem na bai ol man nogut i no inap winim kot bilong God. Na ol man bilong mekim sin bai i no inap i istap insait long lain bilong ol stretpela man. God i save amamas tru long pasin bilong ol stretpela man. Tasol ol man i mekim pasin nogut ol bai i lus olgeta." Buk Song 6:1-6.

Bikpela God i kamapim yumi long piksa bilong em yet wantaim pasin bilong laikim. Yumi kamap wasman bilong olgeta samting God i putim long graun wantaim pasin bilong laikim. Yumi gat asua long ai bilong God long olgeta tok yumi mekim na pasin yumi soim.

Olsem na pret long God na askim tingting bilong em long ol wok yumi mekim long wanwan de.

"...orait long dispela taim wanpela man bilong lain bilong Devit bai i kamap king. Na em bai i laikim tru ol manmeri bilong en na oltaim bai em i bosim ol long stretpela pasin tasol. Em bai i harim ol wari ol manmeri bilong en na bai em i hariap na stretim. Na em bai i strong long mekim gutpela pasin oltaim." Aisaia 16:5

Bikpela God i ken stap wantaim yu long taim yu mekim olgeta disisen bilong yu long givim glori na biknem i go long God na amamas long ol lain yu wok long helpim.

**Toksave: Sapos yu gat wari, tingting planti, yu ken ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. o ring long 79638276 o salim email long:**

# Nupela kampani bilong mekim klos i kam long PNG

**WANPELA** bisnis grup bilong ol meri i sainim wanpela kontrak wantaim Konebada Petroleum Pak Atoriti (KPPA) long kontraksen bilong klos na tekstail faktori long Konebada Petroleum Pak.

KPPA na After Dark Fashion (ADF), wanpela lokal kampani we i bin operet long las 10-pela yia i sainim dispela agrimen.

Menesing Dairekta bilong ADF, Kathleen Ipi Johnson i bin stap insait long kopret teiling indastri na kampani bilong em i saplaim ol kwaliti yunifom bilong planti ogenaiesesen olsem Works Dipatmen na Nesenel Airport Corporation.

Kampani bilong em i bin kamap gut wantaim ekspirians bilong en; wanpela klos faktori i nogat long PNG. Em i bin go raun long ol narapela kantri na lukim ol klos faktori na driman bilong em long gat wanpela bilong em yet long PNG.

Mis Johnson i tok olsem bikpela tingting bilong dispela projek em long kamapim sans bilong ol meri long wok, na planti bilong ol meri i kisim trening long samap tasol i nogat maket bilong salim ol



Dairekta bilong ADF, Kathleen Ipi Johnson na eking Dairekta bilong KPPA, Donald Valu i sainim agrimen.

prodak bilong ol.

Long wankain taim, Seketeri bilong Komyuniti Dvelopmen, Anna Solomon, i tok long dispela tingting olsem, "Dispela projek i gat spes bilong givim gutpela trening na wok bilong ol lokal meri long Sentral provins."

"Dipatmen i amamas long dispela tingting bilong ADF na bai luksave long en olsem wanpela namba wan projek long go aut long olgeta provins long bihain. Mipela i

toktok long givim strong long ol meri long sait bilong ikonomik na ol meri i stap insait long bisnis pinis i mas go bikpela long sapotim ol tarangu meri husat i kisim taim long painim maket."

Dispela saining bilong agrimen long Oktobka 16, i makim namba wan step long developim 5, 000 skwea mita graun bai gat ol hap bilong trening na wanpela rum bilong soim ol save na stail bi-

long PNG.

Taim em i pinis, em bai inap long saplaim ol kainkain prodak bilong PNG olsem ol yunifom, kopret klos, fesen klos, linen na lokal kraf. Ol i makim long salim ol kwaliti prodak i go long intanesenel maket tu.

Dairekta bilong KPPA, Sisia Morea i tok, "dispela em i wanpela impoten taim bilong PNG long kamap wanpela ri-jinol lida insait long tekstail indastri."

## Basamuk Pigeri projek i kirap

**BASAMUK** Wimens Asosiesen long Raikos distrik long Madang provins klostu taim bai lukim wanpela nupela pigeri projek i kirap we bai saplaim ol fres pik mit long dispela hap long distrik.

Dispela projek i kamap bihain long gutpela wokbungu namel long Mineral Risoses Atoriti (MRA) na nikel/kobalt main divelopa, Ramu NiCo Menesmen (MCC) long helpim wok bilong ol ruel meri insait long main impekt eria.

Dispela pigeri projek em MRA i givim mani sapot aninit long Wimen In Maining (WIM) Smol Grent skim we mani mak em K87,000.

Ramu NiCo CA egrikalsa supavaisa, Allan Wahwah i tok olsem dispela pigeri projek i bin stat long mun Oktoba na i luk olsem wok bai pinis long pinis bilong mun Novemba pastaim long opim na ol wokman bai givim projek i go long ol mama grup long stat bilong mun Disemba.

Mista Wahwah i bin mekim lukluk raun i go long eria wok i kamap long en long Mindre viles we tupela CA wokman em Aldam Bande na Munia Lulug i go mas long sapotim ol lokal wok lain long wokim. Ol lokal wok man i amamas long wok na save givim taim

olgeta de na wokim gutpela wok stret.

Mista Lulug i tok ol lokal wok man i givim moa taim long wok na em luk olsem wok bai pinis pastaim long taim ol i makim..

SiAmeri bilong Basamuk Wimens Asosiesen, Doreen Willie i amamas long lukim gutpela wok ol wok lain i wokim.

"Mi amamas olsem nau ol meri i kisim luksave, na kain projek i ken helpim ol meri long ples long kamapim mani na i ken helpim ol long kamapim gutpela sindaun long ples long nau na bihain

taim," Misis Willie i tok.

"Ramu NiCo i harim na lukim kraiblong mipela ol mama na i wok klostu wantaim mipela long lukim olsem mipela i ken mekim wok long strong bilong mipela yet na wok long ol kain sastenabel projek," em i tok.

Misis Willie i tok ol meri long Basamuk wimens asosiesin bai wok klostu wantaim Ramu NiCo CA tim long wok strong na kamapim gutpela wok divelopmen we bai lukim projek karim gutpela kaikai long helpim ol meri long ples.

Ramu NiCo CA egrikalsa supavaisa, Mista Wahwah i

tok olsem Basamuk Wimens Asosiesen bai kisim 8-pela bebi pik i kam long Nesenel Egrikalsa Risets Institiut (NARI) na long Beon CIS pigeri projek long Madang long statim projek bilong ol long Raikos distrik.

Em i tok bikpela as-tingting bilong dispela projek em long kamapim strongpela tingting na save namel long 387 meri husat i memba bilong Basamuk wimens asosiesen long strongim ol long sait long fainensel menesmen na rot long wok strong na lukautim mani.



Ol wokman bilong Ramu NiCo wantaim ol lokal lain i kirapim haus-pik (piggery) bilong ol Basamuk Wimens Asosiesen long Mindre viles long Raikos distrik long Madang.

# Kristen Helt Sevis bai bosim EDEN

**KRISTEN Helt Sevis bilong Papua Niugini nau bai bosim wok we sios i wok long lukautim em 'Effective Development Empowering the Nation' (EDEN) program o Helti Ailan Laipstail long nesanel level long 2016.**

Em i min olsem olgeta wok bilong trening, awenes na edministresen bilong EDEN program bai kam aninit long lukaut bilong Seketeriet opis aninit long Helt Promosen brens.

Sif Eksekeutiv Opisa bilong CHS, Joseph Sika i bin mekim dispela tokaut long taim bilong namba 9 enuel EDEN Konprens long Kefamo, Isten Hailans Provins long 26-30<sup>th</sup> Oktoba.

"Mipela laik mekim dispela kamap wanpela bikpela hap bilong program bilong CHS. Sapos mipela i menesim long CHS Nesanel Opis, olgeta Sios ejensi inap long bihainim dispela kain laipstail tingting long mak bilong ol helt fasiliti. Mipela i laik long lukim trupela senis na dispela em i gutpela stat," Mista Sika i tok.

Mista Sika i tok senis bai kamap



Ol lain i stap long namba 7<sup>th</sup> Enuel EDEN konprens long Kefamo, EHP.

long rot bilong bihainim EDEN laipstail we ol sios olsem Evanjelikal Bradahud Sios (EBC), Saut Si Evanjelikal Sios (EBC) na Nazarene Sios Helt Ejensi i bin kliia na CHS olsem kodineta i laik lukim ol ejensi yusim dispela long ol helt program.

Helti Ailan laipstail em i wanpela bikpela tingting bilong Gavman bi-

long PNG long bringim gutpela helt na sindaun long ol pipel na komyuniti.

Nau dispela kain laipstail i wok long go aut wantaim KRA 7 bilong Nesanel Helt Plen 2011-2020 - "Promotim Helti Lapstail."

Kristen Helt Sevis i kisim Helti Ailan Laipstail tingting na kolim EDEN bikos em i gat holistik lukluk

wantaim as tingting i kam long baibel long ol trening bilong en. Em i givim kliia stia long plening long mak bilong ol wod tu.

Nau gavman i luksave long EDEN program long provinsal level na ol provinsal helt opisa i strongim long daunim ol kain kain sik na strongim ol man na meri long bosim helt bilong ol yet.

"Yumi ken mekim bikpela senis wantaim ol liklik projek mipela i mekim. Yumi mas kamap ol lain bilong kamapim senis olsem na mipela bai putim tingting bilong EDEN i go insait long olgeta program bilong mipela. Mipela i laik lukim wanpela helti, wais PNG na long mekim dispela em long bihainim tingting bilong EDEN long olgeta program na long wei bilong bihainim Gavman Visen bilong 2050," Mista Sika i tok.

Ol lain i stap long trening em ol helt promosen opisa bilong ol kain kain Kristen Helt Sevis ejensi, lokal NGO grup, provinsal na distrik gavman opisa bilong Goroka, Madang na Dokta Bill Bieber na Dokta John Taylor bilong Medikal Embeseda bilong Kanada Asosiesen, husat i bin namba wan long bringim tingting bilong komyuniti helt evanjelisem (CHE) program long ol sios na bihain em i go insait long EDEN wei.

Insait long konprens, CHS i kamapim wanpela kliia strateji plen long wei bilong ranim EDEN long ol helt ejensi bilong ol long kantri.

## Kokoda Komyuniti i kisim moa helt na edukesen haus

KOKODA Inisietiv i givim moa helt na edukesen haus na ol fesiliti bilong wokim ol plama wok i go long ol Kokoda komyuniti Trek rijon.

Long Kokoda De long Novemba 3, Oro Gavana, Gary Juffa, Atoriti bilong Kokoda Trek, James Enage, na Menesing Dairekta bilong PNG Konsevesen na Envairomen Proteksen Eneji, Gunther Joku, na Minista Kaunsila bilong Australia Hai Komisin, Rod Hilton, i bin stap wantaim na opim wanpela dabol klasrum, tupela haus bilong ol woklain, wanpela komyuniti helt pos, ol fe-

siliti bilong mekim ol plama wok na 3-pela wara tenk long Kanga.

Ol haus na fesiliti bilong mekim plama wok em Australia Gavman aninit long Kokoda Inisietiv i givim mani long baim.

Oro Provinsal Helt Edvaise, Copeland Ihove, i tok, "Ol i opim dispela et pos em i wanpela bikpela na amamas developmen i kamap bilong ol pipel bilong Kanga eria bikos ol i no save kisim bikpela sevis long helt inap long 10 yia. Ol pipel bilong Kanga i save wokabaut 3-pela aua long lukim ol woklain bilong givim marasin."

Oro Provinsal Edukesen Edvaise, Maino Vegoli, i tok, "Mipela i sanap strong na i ting olsem ol nupela klasrum bai hapim namba bilong ol pikinini long taim bilong enrolmen, tasol ol papa na mama mas tokim ol pikinini long go long skul."

"Kanga Praimeri em i wanpela skul tasol long wod wan na mipela i amamas long dispela bikpela sevis mipela i kisim," Vegoli i tok.

Edministreta bilong Oro, Sam Vegogo, i tok, "Ol samting mipela i kamapim long Kanga i soim olsem mipela i gat bikpela developmen."

"Mi tok tenkyu long Kokoda Inisietiv na Australia Gavman long givim sapot long kamapim sampela namba wan komyuniti projek insait long komyuniti bilong yumi."

Hilton i tok, "Australia gavman i amamas long mekim patnasip wantaim komyuniti long givim gutpela helt na edukesen sevis long Kanga."

Kokoda Inisietiv em i wok wanbel namel long Gavman bilong PNG na Australia long menesim na lukautim nesural, kalsarel, na historik veliu bilong Owen Stanley Renj, Braun Riva Kesmen na Kokoda Trek.

## Papa i amamas long OoH stretim maus bilong pikinini bilong em



Monte Aua wantaim papa bilong em bihain long ol i somapim maus bilong em pinis long PIH haus sik. Tupela sindaun wantaim volantia Imejensi Rum dokta, Luke Healy long wanpela nius konprens .

WANPELA yangpela papa bilong Galp i amamas long Operesen ov Hope wantaim Pasifik Intenesenel Haus sik i stretim gen maus bilong pikinini bilong em.

Monte Aua, 5-pela yia pikinini boi i bin kamap long bel bilong mama wantaim maus i

bruk tasol nau wantaim gutpela wok marimari bilong Operesen bilong Hop wantaim Pasifik Intenesenel Haus sik long Pot Mosbi, ol i somapim bek maus bilong em.

Papa bilong em Aua i amamas tru na tok tenkyu long PIH.

Dispela em i wan-

pela wok marimari we PIH i bin statim long yia i go pinis na dispela yia long mun Oktoba em i bin nambatu taim ol dokta bilong Amerika Operesen bilong Hop i bin kam bek long mekim dispela wan wik helpim. Ol i somapim maus bilong klostu 30 lain pikinini.



Minista Kaunsila bilong Australian Hai Komisin Rod Hilton lukluk long nupela klasrum ol Australia Gavman i bidim long Kokoda Inisietiv progrem. Poto: Australia media



Chrisma Peter - em i gat 10-pela mun tasol i stap wet long kisim operesen long las mun wantaim mama bilong em Raka Peter na bubu bilong en. Ol bilong Kairuku long Sentral Provins. Poto: Frieda Sila Kana

# Ol sios i strongim wok bilong Edvokasi – PNG Sios Patnasip Program



## LAINIM LONG DIWAI MAMBU

Wanpela man i mekim disisen long pinisim laip bilong em o kilim em yet. Em i les pinis long kain kain wari na hevi em i bungim olgeta de. Olsem na em i go lukim **man bilong givim tok stia** bilong em na askim em long givim wanpela gutpela edvais bai em i no ken pinisim laip bilong em.

Bekim bilong man bilong givim tok stia, i mekim em i kirap nogut tru. **“Wanem samting yu lukim nabaut?”**. Man i bekim: **“Mi lukim mambu tri na Fern”**.

Man bilong givim tok stia i tokim em: **“Taim mi bin planim pikinini bilong fern na mambu long wankain taim. Mi lukautim tupela gutpela tru. Mi givim lait na wara olgeta de. Pikinini fern i kamapim kru na gro hariap. Grin kala bilong em i karamapim graun olsem kapet. Tasol i no gat wanpela samting i kamap long mambu yet.**

**Long namba tu yia, fern i kamap gutpela moamoa yet. Mambu i no soim wanpela sain bilong yet. Tasol mi no les long givim wara long em.**

**Long namba tri na namba foa yia, i no gat samting i kamap long mambu yet. Mi givim wara yet long moning na apinun olgeta de.**

**Na long namba faiv yia, i gat liklik kru bilong mambu i kamap long graun. Long namba faiv yia olgeta fern i kamap bikpela pinis. Sikspela mun bihain, mambu i gro i go inap long 100 fit olgeta pinis.**

**Tru tumas. Long 5-pela yia olgeta mambu i groim ruts o han bilong em insait long graun. Olgeta han insait long graun (ruts) i mekim mambu i kamap strong na mekim redi olgeta samting diwai mambu i nid long laip bilong em”**.

Bihain Man bilong givim tok stia i tok moa; **“Laip bilong yumi long dispela graun i no save kirapim o kamapim hevi na wari long yumi we yumi bai i no inap stretim. Nogat”**.

Em i tokim man ya gen: **“Em i tru. Inap tude yu bin karim planti hevi. Yu bin taitim bun na hat wok long karim hevi na wari bilong yu. Yu save? Em i mak olsem yu bin groim ruts insait long yu. Mi no les long givim wara long mambu olgeta de. Olsem na no ken les long laip bilong yu”**.

No ken skelim laip bilong yu wantaim laip bilong narapela manmeri.

Diwai mambu i gat narakain wok bilong em. Fern tu i gat wok bilong em long gro. Tasol tupela mekim bush i kamap naispela.

Taim bilong yu bai kamap. Yu bai gro bikpela na i go antap tru. Olsem wanem bai yu kamap longpela antap? Olsem wanem mambu bai gro na kamap longpela i go antap? Em i gro inap long em i laik. Wankain long yu. Yu mas gro na kamap longpela i go antap long laik bilong yu.

**No ken pilim sori wanpela de long laip bilong yu:**

**Gutpela de bai givim yu amamas. De no gut bai givim yu ekspiens o save long lainim. Tupela wantaim i kamap na givim laip bilong yu.**

**Amamas i mekim yu i kamap swit. Hevi na wari i mekim yu i kamap strong. Wari na bel hevi i mekim yu i kamap strongpela man.**

**Taim yu pundaun long laip bilong yu, em i mekim yu long lainim daun pasin. Kamapim gutpela wok i mekim yu sain na soim lait na bilip bilong yu tasol bai givim strong long yu i go het.**



Ol sios lida na ol memba bilong Sios Patnasip Program wantaim ol fasiliteta bilong Australia Hai Komisen i stap long CPP forum.

**PAPUA Niugini na Australia Kaunsil Lida bilong ol sios i bin bung long Kimbe las wik long strongim wok bung na gavanens edvokasi long kantri na long toktok long wanem samting bai kamap moa long narapela 5-Yia Sios Patnasip Program aninit long nupela PNG Gavanens Fasiliti.**

Ol sevenpela bikpela sios long PNG em; Anglican Sios, Baptis Yunien, Katolik Sios, Evanjelikal Luteran Sios, Salvesen Ami, Seven De Edventis na Yunaitet Sios wantaim ol susa sios bilong ol long Australia aninit long; Anglican Bod ov Misin, Trans-

fom Eid Intenesenel, Caritas Australia, Luteran Wol Sevis, Salvesen Ami, Edventis Dvelopmen Rilif Ejensi Australia na Yunaiting Wol.

Aninit long Gavanens na Edvokasi strateji, ol Sios i wok long opim ol patnasip bilong ol wantaim ol narapela Sivel Sosaiti Ogenaisesen olsem Transparensi Intenesenel PNG, Melanesian Institut, Asembli bilong Disebel Pipel na PNG Traibel Faundes.

Dipatmen bilong Komyuniti Dvelopmen i save makim maus bilong Nesenel Gavman.

Bikpela toktok long las wik

em long lukluk long Tioloji bilong Jenda Ikwaliiti we ol Sios i kamapim wantaim Jenda Strateji. Tioloji bilong Jenda Ikwaliiti na Jenda Strateji ol i hap bilong wanpela strongpela faundes bilong bel isi na gutpela sindaun bilong famili, komyuniti, institusen, ol distrik na ol provins.

Ol sios lida i toktok tu long nesenwaid netwok bilong ol sios we i luksave long gutpela wok bung bilong ol we inap long helpim gavman long wok bilong disasta rilif saplai bilong El Nino. Ol Sios lida i mekim singaut long Nesenel Gavman long yusim ol sios netwok long karimaut gut wok

bilong helpim ol pipel i stap long hevi.

Ol lain i mekim ol toktok long forum em Australia Hai Komisen Opisal olsem Minista Kaunsila Rod Hilton, Gavanens Fasiliti Edvaisa Steve Hogg, Fes Seketeri Gavanens, Jo Ronalds, Martin Brash bilong SPSN na Marjorie Andrew bilong Institut bilong Nesenel Afeas.

Dispela em i hap bilong wanpela CPP Oktoba Forum we i bin kamap long Kimbe we ol Anglican Sios bilong PNG wantaim Patnasip bilong Anglican Bod ov Misin, long Australia i go pas long en.


## UCPNG i bung 2015 Evanjelisim Konprens

WANPELA bikpela bung bilong ol lain Yunaitet Sios long Papua Niugini (UCPNG) i kamap long Don Bosco Teknologikal Institut long Pot Mosbi long Sande Novemba 1 na bai stap inap wan wik olgeta.

Het tok bilong dispela bung em Preaching in the Holy Spirit: A higher calling. Modereta bilong UCPNG, Reveren Bernard Siai i tokim ol lei woka na ol pastor olsem evanjelisim o autim tok bilong God, em i namba wan wok bilong Yunaitet Sios long Papua Niugini, na ol i mas wokim stret dispela wok.

Reveren Siai i ritim tok i kam long buk bilong profet Esekiel 37 we em i bin toktok long ol drai bun na ol i kamap laip gen long taim God i givim koman long ol.

‘Evanjelisim em i namba wan as sios i kamap. Bai yumi mekim wanem long ol lain i laik kisim laip? Ol drai bun i mas kamap laip gen long pawa bilong Holi Spirit. Yumi mas strong long kisim ol lain husat i nidim tok bilong God na pawa bilong Holi Spirit i ken pas long ol



Modereta Bernard Siai – Wantok file photo.

tu. Evanjelisim i mas wok. Evanjelisim i bilong olgeta lain, maski sapos ol i bilong narapela hap.’

Driman bilong olpela

modereta bilong Yunaitet Sios em evanjelisim i mas namba wan wok bilong UCPNG. Olsem na dispela i stap insait long las faiv yia

plon bilong UCPNG, na bai stap yet long ol yia i kam bihain.

Modereta Siai i toktok tu long ol pipel long Midel Is husat i lusim laip bilong ol bikos ol i bilip long Jisas Kraus. Em i luksave tu long ol lain husat i lusim laip bilong ol bikos long wok ol i mekim long autim tok bilong God.

Em i tok ol Kristen tude i wok long bungim planti salens tru na i paulim ol nabaut. Sampela bilong ol dispela em, man i maritim man o meri i maritim meri, pamuk pasin, na ol pipel i kalap nabaut long arapela sios. Em i tok tu olsem dispela bikpela hevi El Nino i kamapim, i salensim sios tu long wanem samting sios i mas mekim long helpim ol pipel.

‘UCPNG i winim 40 yia pinis. Long narapela 40 yia i kam, em i mas muv i go het na harim maus bilong God’ em i tok.

# Rekot taim bilong tokaut na tok orait long baset



**BASET bilong 2016 i kamap nau. Palamen i brukim rekot gen long tokaut long dispela K14.2 bilien baset na muvum mosen long tok orait long en long wanpela de tasol.**

Gavman i yusim namba bilong en long mekim olsem na i no givim sans long Oposisen long givim tingting bilong ol long baset, o larim ol arapela memba long glasim baset na paitim toktok long en.

Baset bilong wanpela kantri em i bikpela samting tru. Long ol arapela kantri we i gat palamenteri demokrasi, olgeta memba bilong gavman na oposisen wantaim i mas gat sans long ritim ol baset buk pastaim.

Orait, bihain bai ol i gat sans long askim Minista o Praim Minista yet long wanem as bilong skelim mani i go long ol samting i stap insait long baset.

Na watpo na gavman i no mekim olsem long Tunde long taim ol i tokaut long 2016 baset long palamen?

Wan wan memba i mas gat taim long skelim wanem kain mani i go long ilektoret bilong em na long ol gavman dipatmen.

Ol memba i mas gat sans long save gut long wanem kain rot gavman bai kamapim mani, orait em i mas gat sans long askim ol kwesten long palamen.

I mas gat taim long Oposisen tu long skelim mani plen bilong Gavman na givim bekim bilong ol.

I gat planti toktok i kamap nau



Mista Spika, mi givim tok orait long dispela baset minista bilong treseri i givim. Mi save, ilektoret bilong mi i gat baset i stap insait. K10milien..

Jada 0151



Aiyoo! mi no sekim gut baset na mi tok orait nating!.. Treseri i daunim olgeta LLG baset i go daun tru!! Aiyoo mama!

olsem PNG i sot long mani. I gat planti toktok i kamap olsem ikonomi bilong kiantri bai i slo daun neks yia na sampela yia bihain.

I gat tok pret olsem gavman bai yusim mani bilong LNG long

mekim wok bilong en. Sapos ol dispela pret toktok em ol tokwin nating, orait, em i wok bilong Gavman long tok stret na klaim tingting bilong ol pipel.

Tresera i bin tokaut long taim bilong baset olsem ikonomi bilong

kantri bai i slo daun liklik. Na olsem wanem long mani bilong LNG? Dispela mani i stap we na wanem taim bai PNG i ken lukim kaikai bilong en?

Long dispela wik tu, Gavana bilong Hela i bin askim sapos i tru

olsem Gavman bai yusim dispela mani long kisim moa dinau bilong mekim wok bilong kantri.

Gavana i wari bikos sapos dispela tok i tru, bai ol pikinini na tum-buna bilong yumi long bihain taim bai i hatwok long bekim ol dispela dinau.

Wankain askim tu bai go long gavman long dispela toktok bilong Gavana bilong Hela. I mas gat klia bekim i kam long gavman.

Planti ol papagraun bilong ol ples we LNG i kam long en i wok long wetim yet mani bilong ol.

Bai ol i no inap wanbel sapos ol i harim ol tokwin nabaut. Olsem na nesanel gavman yet i mas tok klia long ol tu wantaim yumi ol arapela pipel bilong kantri long dispela samting na long Sevren Welt Fan tu.

Wanem as bilong Sovren Welt Fan na wanem taim bai kantri i lukim kaikai bilong en?

Ol dispela askim i no bilong westim taim bilong gavman o hatim bel bilong ol memba o bilong daunim gavman na sapotim oposisen. Nogat. PNG i wanpela demokretik kantri na ol pipel i gat rait long save long wanem kain samting ol memba bilong palamen i mekim.

Ol memba i makim maus bilong pipel na ol i mas gat sans long askim kwesten na autim tingting bilong ol.

Sapos palamen i no givim dispela sans long ol, ating bai yumi mas wari bikos ol lida i popaia nau long as bilong dispela hap tok, palamenteri demokrasi.

# Kamapim gen ol gavman stua



**GAVMAN** i mas kamapim gen gavman stua long ol provins long strongim em yet long givim helpim isi taim hevi i kamap long ol manmeri.

Dispela helpim em long i no ken hatwok long painim mani taim ol bikpela bagarap i kamap.

Kamapim gavman stua i gutpela long wanem dispela i helpim tu long em i no ken bagarapim ol mani plen em i gat pinis long kamapim ol arapela samting.

Gavman stua o pablik stua em wea haus ol kaikai na ol kain samting gavman i save lukautim long was long taim ol hevi i kamap.

Dispela kain stua i bin stap long wan wan ol provins i kam inap long 1980s we gavman i no save lukautim gut na dispela sistem i bruk daun.

Dispela ol stua i save strongim gut gavman long

arapela hevi kamap bihain long dispela ol hevi.

Wankain gen bikpela piksa bilong kain bagarap i kamap em hevi bilong longpela drai sisen o El Nino nau kantri i wok long stap long em.

Gavman i no save wanem hap em bai kisim inap mani na lukautim ol manmeri.

Em i makim K25 milien long skelim namel long ol hap ples we bikpela drai sisen o fros i kamap long em.

Dispela mani i gat luksave olsem i no inap long helpim olgeta manmani.

Nau em i askim wan wan ol memba long ol i kisim K2 milien long distrik sevises impruvemen program (DSIP) fan bilong ol na helpim ol manmeri.

Na dispela i soim klia olsem gavman i no gat plen o stua long helpim ol manmeri taim hevi i kamap na

olsem em i mas painim rot long kisim mani.

Dispela K2 milien i plen bilong developim ol manmeri na ples long wan wan ol distrik na olsem em i no ken go na askim gen ol memba long yusim long narapela samting. Nogat.

Taim Australia gavman i lukautim Papua Niugini em i save long kain hevi i save kamap na olsem em i kamapim ol gavman stua.

Nau Papua Niugini gavman i kamap na i ting kain stua i samting nating na i no laik long lukautim.

Bikos long kain pasin bilong em nau em i bungim hevi long em i gat strong long hariap helpim ol manmeri husat i bungim ol hevi.

Nau em taim gavman i skelim pasin bilong em na kamapim gen ol gavman stua long strongim em yet long helpim ol manmeri taim ol bikpela hevi i kamap long ol.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Websait: [www.wantokniuspepa.com](http://www.wantokniuspepa.com)

Pe bilong wanpela yia, 52 niuspepa

<b>Ples:</b>	<b>Air:</b>
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

**General Manager**  
Elizabeth Konga

**Editor**  
Veronica Hatutasi

Published at Able Building Complex, Sec 58 Lot 02, Waigani Drive.

**Word Publishing Company Limited** is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

# Papua Niugini i no ken wet long 100 yia moa - Embeseda North

**NO** longtaim i go pinis, Embeseda bilong Yunaitet Stets bilong Amerika (USA), Walter North, i bin toktok long wanpela foram we ol i bung long daunim pasin bilong sutim tok long ol manmeri husat ol i ting i wokim sanguma.

Insait long dispela kibung we Katolik Daiosis bilong Mendi i sponsaim, Embeseda North i tok olsem Papua Niugini i mas no ken wet long 100 yia moa pastaim long kantri i kamap fri long pasin bilong bilip bilong sanguma.

“Mi makim long lukim ol maus bilong ol lain i salensim dispela kain bilip. Mi harim

nek bilong ol Katolik sista na ol narapela lain husat i save putim laip bilong ol yet long birua long traim na stopim ol vailens i save kamap long ol man na meri long toktok bilong sanguma.

“Mi sanap na mekim luksave long ol man na meri long ol ples we i save kisim na lukautim ol lain husat i kisim bagarap long dispela hevi. Mi putim long lewa bilong mi strong bilong ol lain husat i kisim hevi na ol inap long telimautim stori bilong ol. Mi tok amamas long ol man na meri husat i save mekim wok olgeta de, long pinisim pasin bilong pait insait long dispela kantri.



Embeseda bilong USA long PNG, Solomon Ailan na Vanuatu, Walter North i toktok long Foram las mun.

*Poto: Fr. Philip Gibbs*

“Ol dispela nek em ol i no ken sarapim. Ol i givim yumi strong na salens long no ken les na lusim bilip na tingting nating. Mi gat strongpela bilip olsem strong bilong ol na tingting bilong ol long wan wan de inap long senisim dispela kantri long “ples bilong kirap nogut,” i go long wanpela kantri we ol tingting bilong lukautim gutnem bilong ol man na laip i stap fri long vailens.” Embeseda North i tok.

“Klostu tripela yia mi stap long dispela kantri, na mi lukim strongpela pasin bilong sori na pasin bilong sanap strong long taim bilong hevi, em mi lukim long planti Papua Niugini pipel mi bungim. Dispela kain ol gutpela pasin i mas go long strongim wok bilong daunim na pinisim olgeta pasin bilong paitim na bagarapim man na meri bikos long toktok bilong sanguma.

Long dispela as tasol mi strongim tok bilong Praim Minista olsem ol sitisen wantaim gavman “I mas wok klostu long ol komyuniti long senisim pasin na krungutim na rausim olgeta dispela pasin.”

Mi skruim tok bilong pastaim Presiden bilong USA, Bill Clinton, ‘I no gat wanpela samting i wrong wantaim PNG em i no inap long stretim wantaim stretpela samting we i stap long PNG yet.’ Mista North i tok.



U.S. Embeseda toktok long ol lain i stap long woksop long Mendi long taim bilong foram. *Poto: U.S embesi*

Kilim dai nating ol manmeri ol i sutim tok olsem em sanguma mas stop nau!



Jada 015!

# Bagarapim man long sutim tok sanguma em i pasin i nogut olgeta – Katolik Bisop

**B**ISOP Don Lippert bilong Katolik Daiosis bilong Mendi i bin mekim toktok long wanpela forum olsem pasin bilong sutim tok nating long wanpela man o meri long pasin sanguma na ol i save bagarapim ol em i pasin i nogut olgeta na luk olsem em i wanpela giaman pasin bilong sampela man i laik traim long banisim na lukautim komyuniti bilong ol, tasol i no stret.

Bisop Lippert i tok olsem bihain long em i lukim ol pasin no gut tru i bin kamap long Mendi we ol i bagarapim tru ol meri long ol i giaman tok olsem ol i mekim sanguma, long mun Ogas. Em i laikim ol pipel long save olsem pasin bilong kilim ol man na meri husat i no gat rong em i brukim lo bilong God, lo bilong intenesenel komyuniti na lo bilong PNG na em i singaut long dispela pasin i mas stop.

“Yumi no ken wet long ol pipel long senisim bilip bilong ol long pasin sanguma. Yumi mas mekim samting nau long stopim ol pipel long bihainim dispela kain tingting na pasin bilong bagarapim ol narapela. Ol pipel husat i mekim ol dispela rabis pasin (bungim olgeta lain bilong sutim tok na ol glasman) i gat asua na ol i mas sanap long ai bilong lo bilong PNG. Pasin bilong bagarapim narapela bikos long toktok bilong sanguma pasin bai i no inap stop sapos ol pipel husat i save mekim dispela kain pasin i mekim nating long laik bilong ol na i no gat samting i pasim ol. I mas gat wanpela lo i stopim ol. Moa long dispela, gavman inap long mekim sampela samting long lainim ol pipel olsem dispela kain pasin em i



Bisop Don Lippert bilong Katolik Daiosis bilong Mendi.

no mas kamap.” Bisop Lippert i tok.

“Mi ting olsem mipela ol wok lain bilong lotu i mas tokaut olsem sampela toktok i sut long pasin lotu olsem pasin bilong lotu i larim bilip bilong sanguma i go het yet. Bilip long sanguma em i sakim tok bilong Baibel na

olgeta kain lotu pasin. Mi bilip olsem pasin Kristen i gat ol rot na pasin bilong stopim bilip bilong sanguma na sios i gat pawa long mekim. Olsem na olgeta lotu lain i mas kam bung wantaim long wokim bikpela plen long stretim dispela hevi na pasin nogut we i wok long bagarapim ol pipel.

“Saiens tu i no mekim gut wok bilong en. Bilong wanem, i gat ol manmeri husat i kisim bikpela skul long as bilong medikal saiens, tasol ol i bilip yet long sanguma.

“Sutim tok long ol meri olsem ol i sanguma na bagarapim na kilim ol long pablik em i no pasin kalsa bilong tumbuna. Em i wanpela pasin pamuk i giaman kamap olsem pasin kalsa na kastom. Em i kam long wanem hap? Ating em i kamap bikos long ol man long ples i wok long lusim posisen bilong ol na luksave bilong ol wok bi-

long tumbuna kalsa, we ol i save go pas long pait wantaim ol birua, na ol i wok bilong banisim ol famili, graun na ol pik samting.

Mi lukim ol yangpela man i lus na ol i mekim pasin nogut tude na mi wari na kraik long bel bilong mi long lukim olsem gutpela lukluk na nem bilong man PNG em i pundaun pinis. Wantaim dispela pasin bilong bagrapim ol meri em ating ol i laikim kisim bek ples bilong ol long komyuniti olsem ol lain bilong lukautim na banisim ol komyuniti bilong ol? Tasol ol i popaia na wokim rabis pasin.

Bisop Lippert i tok em i hop na pre olsem dispela Forum we Daiosis bilong Mendi i sponsaim bai bung wantaim olgeta narapela hap bilong sosaiti na “sanap bung wantaim long daunim pasin bilong vailens i kamap long bilip bilong sanguma,” na pinisim olgeta.



Philip Maso, wanpela risetsa bilong Enga Takeanda kalsa senta.

## Pasin bilong sutim tok long sanguma i nupela long Enga – Risetsa

LONG wanpela forum bilong daunim pasin bilong sutim tok nating long ol manmeri olsem ol i sanguma, we i kamap long Katolik Daiosis long Mendi, Philip

Maso, wanpela risetsa bilong Enga Takeanda (kalsa senta) i tok olsem, bilip bilong pasin sanguma na bagarapim man na meri em i nupela samting long Enga na ol lain i no gat strong em ol i wok long kisim bagarap.

Lukluk bek long pasin tumbuna bilong ol Enga, em i mekim wanpela tok bilong ol Enga olsem, “Tambuaka kaleke pyakalo – (Mi putim wanpela braunpela mak long wanpela pik bilong yu)”. Dispela kain toktok em wanpela man o meri husat i no gat strong long helpim em yet, taim laip bilong em i stap long han bilong ol birua i save mekim dispela kain toktok long taim ol i laik kilim em. Trupela samting em dispela man i no redim wanpela pik tasol em i mekim toktok tasol long ol i no ken kisim laip bilong en.

I gat narapela toktok long Enga i olsem, “Ita tao kalyanya kingi soo pyandala naenge, (Yu ken putim han bilong yu long paia i lait)” Yu no laikim han bilong yu bai paia. Man o meri husat i kisim toktok bilong sanguma na ol i wok long kilim em bai i no inap long pasim maus na karim pen nating. Tarangu man o meri ya bai mas mekim sampela toktok long rausim han bilong em long paia i lait. Olsem na wanem kain tok em i mekim long taim em i wok long pilim pen em i no tru. Ol i tok tasol long stopim ol lain i givim pen long ol long stopim dispela pasin.

“Sanguma em i kam long narapela hap i kam insait long Enga 10-pela yia i go pinis,” Mista Maso i tok.

“Namba wan taim ol i sutim tok long wanpela meri em long ples bilong mi, we ol makim wanpela meri olsem em i wokim sanguma na ol i kukim em long paia taim em i stap laip yet. Em i nupela kain pasin na ol pipel i pret. Namba tu pasin olsem i kamap long Enga em tu kamap long hap bilong mi, we ol i holim pasim tupela meri na bagarapim tupela. Wanpela i dai na narapela i no dai.

“Bihain, mipela i holim woksop long paris bilong mipela inap long tripela de wantaim Pater Philip Gibbs. Mipela i luksave olsem i no gat wanpela man i bin lukim narapela man i kamautim lewa bilong narapela tasol ol i sutim tok stat long wanpela i tok, “ol i tok,” o “mi harim ol i tok, o mi harim olsem.”

Bihain long woksop planti pipel i stat toktok long pasin sanguma na tokim ol man long ol i no ken bilip long en. Dispela program i lukim paris pris bilong mipela na ol narapela bikpela man na meri insait long sios na komyuniti long mekim toktok.

“Mipela kamapim wanpela grup, Katambi em i min “laip”. Dispela grup i luksave long olgeta dai i kamap long dispela hap we i karamapim 21 bikpela klen. Bihainim ol rekot bilong mipela bihain long mipela i holim dispela woksop na mipela i kamapim Katambi tim i bin gat wanpela keis tasol long las yia. Ol toktok bilong sanguma long dispela hap i go daun na nau ol pipel i no moa gat pret na ol i no laik toktok moa long dispela samting. Planti pipel nau i bilip olsem pasin sanguma em i no trupela. I mas gat wanpela tim we ol man na meri i ken mekim awenes long stopim ol pipel i no ken sutim tok na bagarapim ol narapela bikos long bilip bilong sanguma. Wanpela o tupela lain tasol i no inap long mekim.”

“Mipela i traim pinis na em i wok olsem na em inap wok long ol narapela lain tu sapos ol i muv na bung olsem wanpela tim na mekim.” Mista Maso i tok.



# Mipela redi tasol

...CS ben i redi long kukim Finsafen

**Nicky Bernard i raitim**

**CS Paip na Dram Woda manmeri i redi nau long go long Morobe Provins long opim nupela haus kalabus bilong ol pipel long Finsafen.**

CS ben em i wanpela bilong olpela ben insait long kantri wantaim ol Ami ben na Polis ben, dispela ol ben bilong gavman i gat bikipela histori bilong ol long taim bilong ol waitman husat i kam stap bipo long yumi kisim indipendens.

CS ben i save bung wantaim ol Ami ben long wanem ol i save pilaim sem musik na tu ol i gat wantaim ol instramen bilong pilai.

Taim dispela tupela ben (CS na Ami) i bung wantaim polis ben, musik bilong tupela save mekim planti stail insait taim em pairap.

Ol CS ben woda save stap

tasol long Mosbi, planti bilong ol yangpela woda manmeri i stat long joinim na lainim wei bilong pilai musik.

Musik bilong CS na ami ben em ol kisim kam stret long Skotlen na Innglan long ples bilong Kwin, na taim bikipela bung long Gavman long hap Gavana Jenerel bilong PNG stap long en, ol CS o ami save go na pilaim musik, long wanem dispela musik kam stret long Innglan.

CS ben bai mekim wanpela pilai long dispela Fonde long Gavman Haus na bihain ol bai redi long go long Morobe long opim nupela haus kalabus long Finsafen.

Planti bilong ol ben memba bilong CS i go malolo na tu go long sampela wok insait long kantri na liklik grup tasol bai kisim nupela ol Pipes na Dram bilong ol go soim ol pipel long Finsafen.



Ol CS ben i sanap kisim poto bihain long ol i prektis bilong go long Gavman Haus long Fonde. Planti bilong ol ben memba i stap long malolo na planti bilong ol yangpela manmeri tu nau i joinim ben. *Poto Nicky Bernard.*

## Stori bilong tumbuna

### Gel i kamap Pisin

Bipo bipo tru insait long bikipela bus ol i kolim Karta insait long Isten Hailens provins, i gat tupela lapun i save stap wantaim wanpela liklik gel bilong tupela.

Olgeta taim lapun papa na mama i save givim hatwok tru long liklik gel, long go pulumapim wara, klinim gaden na brukim paiawut.

Olgeta taim, na tarangu gel i no save malolo liklik.

Na taim liklik i save pinisim wok gut tru, em wokabout isi – isi na hangre wantaim kam long haus.

Taim lapun papa-mama ol i lukim em, ol i save kaikai tit na tromoi paiawut i kam long dua na tokim em olsem, "Dog kaikai dispela kaikai long gutpela wok yu i mekim." Taim papa na mama i save tok olsem, em i save kra i na go slip nating wantaim hangre bel.

Long san i go na san i kam antap, ol i save mekim seim pasin long em.

So long wanpela nait, em i go sindaun aninit long bikipela oak diwai na kra i stap. Wanpela tewel meri em was long em na i sori tru long em.

Taim em i go long haus ol lapun i askim, yu stap we na kam long nait na ol i belhat na paitim em nogut tru wantaim drai diwai. Liklik gal i singaut nogut tru na kra i wantaim pen long skin.

Taim tewel meri i harim, hariap tru em i go na senisim em i kamap pisin. Taim lapun i lukim, ol i pret na larim em i plai i go wanem hap em i go na lus olgeta.

Olsem nau ol sampela Isten Hailens meri i save senis kamap pisin taim wanpela sista o brata bilong ol i stap long bikipela hevi. Wei bilong ol wan wan long tumbuna na kastom bilong ol.

Ambigka Maime  
NCD

#### TOKSAVE:

WANTOK i askim ol gutpela rida bilong em long salim ol tumbuna stori i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C-Word Publishing Company, P O Box 1982, BOROKO, NCD, PNG o email edres: editorial@wantok.com.pg Telepon namba: 3252500.*

Tenkyu

## Yunaitet Nesens selebretim 70 yia na givim presen long PNG

**Frieda Sila Kana i raitim**

YUNAITET Nesens (UN) i bin selebretim 70 yia bilong mekim wok long wol long de 29 bilong las mun Oktoba long Pot Mosbi. De tru em i pundaun long 24 Oktoba tasol ol UN opis long Pot Mosbi i bin makim de 29 Oktoba long selebretim.

Long dispela taim UN opis i mekim luksave long 40 yia indipendens bilong Papua Niugini na ol i givim wanpela atwok o dro bilong ol pikinini i go long Nesenel Musium na At Galeri long Pot Mosbi.

Kantri residen kodineta bilong UN, Roy Trivedy i bin stap na givim dispela presen i go long han bilong Dairekta bilong Musium, Dokta Andrew Moutu na Minista bilong Nesenel Plening, Monitarung na Rurel Implementesen, Charles Abel i bin stap tu.

Mista Trivedy i bin tok olsem UN de em i bin kamap long 24 Oktoba tasol ol i selebretim long dispela taim. Em i tok, Yunaitet Nesen em yumi ol-

geta bikos UN i kamap long mekim wok bilong olgeta pipel long wol.

"Long Papua Niugini UN i bin stat liklik taim tasol bihain long indipendens de. Namba wan opis em long Wol Helt Ogenaisesen we ol i bin opim long 1976 na bihain liklik long 1986 ol i bin kisim namba wan UNICEF opis insait long dispela haus long Nesenel Musium.

"Insait long Papua Niugini mipela i gat spesol rilesensip wantaim gavman, ol arapela ogenaisesen na ol pipel. Mi amamas tru long makim Yunaitet Nesen long dispela kantri," Mista Trivedy tok.

Em i tok UN nau i gat 193 memba kantri nau i stap. UN i save helpim long kain kain developmen nid long Papua Niugini na long ol narapela hap bilong wol tu.

Mista Trivedy i bekim tok bilong Minista bilong Nesenel Plening long helpim long taim bagarap bilong El Nino na em i tok, bai em i bringim i go long opis bilong

UN na bai ol i ken traim helpim.

Long tok amamas bilong UN, ol i bin askim ol gret 4 pikinini long Hagara Praimeri skul long putim tingting bilong ol long wanem samting ol i laikim long bai kamap long komyuniti bilong ol. Ol i wokim

wanpela penting we i soim pes bilong wanpela pikinini. Dispela piksa i soim olsem taim yu stap longwe bai yu no luksave tasol sapos yu go klostu moa bai yu lukim olsem em i pes bilong wanpela pikinini. Em i soim Nesenel Aidentiti bilong ol pikinini long kantri.

**L-R Roy Trivedy – UN Kantri Representativ long PNG, Dairekta bilong Nesenel At na Musium, Dokta Andrew Moutu, na Minista bilong Nesenel Plening, Charles Abel sanap long fran bilong dro bilong ol pikinini bilong Hagara.**



Ol sampela kaving na kalsa samting insait long At Galeri bilong Nesenel Musium.



Em nau! Ol pikinini i ken painim rot i go long ples wantaim Wantok kru...



**Giaman tu orait**

Kanage i save slip antap long longpela bet insait long haus.

Wanpela nait bihain long lait i of, ol haus lain i harim bikpela nois pairap long plua bilong haus.

Na olgeta i ran i go long lukim wanem samt-ing i mekim bikpela nois stret.

Taim ol i lukluk ol i lukim Kanage i sanap isi long plua na taim Kanage i lukim ol em i hariap tru long painim ki bilong kabot bilong em.

Samting tru em, em i pundaun long plua na mekim bikpela nois.

**Hompri Primary Morobe provins.**

**Hap yau pas**

Wanpela yangpela mangi wok long mekim kaikai soping bilong en long maket. Kanage tu i bin i stap salim banana bilong en i stap. Na mangi i go na askim Kanage. "Hau mas long banana bilong yu?"

Kanage em slip stap na em i no save olsem mangi i askim wanem samting stret.

Mangi i askim gen tasol stil Kanage i no mekim wanpela bekim.

Mangi i laikim banana bilong Kanage na i laikim stret long baim na em i singaut antap stret long Kanage na Kanage kirap nogut tru na tok, "AAAAAAA.....amas"



**Ebyn Seseru**

**Soka kompetisen**


Wanpela taim, wanpela soka kompetisen i kamap long Bulolo namel long ol Bulolo Forestry Koles na Wau Sekendari skul tim.

Plantu ol manmeri i lukluk i stap wantaim ol sampela wait man. Tupela tim i no pilai gut olsem na wait man i kirap na tok olsem, "Ol lain pilai deti gem stret." Kanage i harim na em i kirap na i tok, "Tru ya, ol i no was was na ol i kam long pilai."

**Bulolo**



EM ORAIT




EM NOGUT

*Ol wod lista hia:*

- AMATA
- ANTEM
- BIKHET
- BAKSTOA
- BIHAINIM
- DABOL
- DRAI
- FIFTIN
- GAVMAN
- GOAN
- HANWAS
- HUK
- KALABUSIM
- KENSA
- KROSIM
- LIDASIP
- LUKIM
- MIDIA
- MESEJ
- NAIP
- NILPIS
- NUPELA
- PISPIS
- PETRON
- PORETIM

CHNONKUEEGSBRGSSSLHEY  
 JAIRTQODAFNDEVBMC SIR  
 XYMDHWTAGTITARJOCNEO  
 ONNAEILBLTFPEXHBMMG  
 FXTOEGFODFZBIHAINIMH  
 NEFTILGLWREONBAKSTOA  
 YBNHOVEUWAAAPAHUKAON  
 NKHNTIIKASOIIUBKNTAW  
 RCENHEHIEGAVMANRCYIA  
 OYNDNLEMKN AFL OAXQDS  
 EXEYEHUGGMSAIIIFSDEEL  
 MNTBANTEMFKADFI IAHSI  
 PNHLCKGEPSEIAPTMMNME  
 RYNGENRMHPMASPHIOIHS  
 DHBZKNBDGFSIIOTRNL YA  
 REQNHZMZESPMPRTIUPXR  
 CFLFDPADSBIKHETEPIQL  
 SAAKSRHAYBJEPTDMESEJ  
 OOAIFEP RCGOAIYCLPMP  
 KONOTPSTPICPAMATAVAI

Ansa bilong Wod Pilai isu 2146





**TOK PISIN NEWS**  
from Radio Australia  
radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)

**Ol 14 Vanuatu MP  
i go long kalabus**

I GAT gutpela lukluk olsem jastis sistem bilong Vanuatu i wok gut nau bihain long mekim save we Supreme Kot i wokim long las wik.  
Suprim kot bilong Vanuatu i salim 14 ol memba bilong palamen i go long kalabus we taim kot i painim olsem ol i brukim lo bilong braiberi na korapsen sas.  
Spika bilong palamen husat i bin givim marimari long em yet na narapela 13 memba bilong palaman taim em i bin stap olsem Ekting Presiden, olsem na ol i givim em taim

tripela yia long go kalabus. Deputi Praim Minista Moana Carcasses Kalosi bai kalabus long 4 yia na memba bilong Pentecost Toni Nari bai kalabus long tripela yia na sikispela mun.  
Suprim kot jas, Jastis Mary Sey i salim olgeta arapela memba long kisim tripela yia long kalabus.  
Fainens Minista husat i bin tokaut olsem em i mekim rong, pastaim long kot i harim keis, em kot i rausim 20 mun o saspenim 20 mun mekim save taim bilong em.

**Praivet Sekta Rifom  
bai kirapim ADB  
invesmen long  
Cook Ailan**

LONG kamapim gutpela hap bilong wokim bisnis, Cook Ailans bai grisim sampela moa praivet sekta invesmen long strongim wok bilong turisim indastri long bihain na long divelopim ol arapela sekta na long kamapim gutpela sindaun.  
Dispela tok i bin kamap long wanpela Esia Developmen Benk (ADB) ripot we ol i bin putim aut las wik.  
Ripot, The Cook Islands: Stronger Investment Climate for Sustainable Growth, i lukluk long ol salens we kantri i bungim long wok bilong strongim ikonomi bilong ena na i givim ol rekomendesen we bai sapatim praivet-sekta long mekim ikonomii gro.  
Minista bilong Fainens, Brown i bin tokaut long dispela long wanpela belo kaikai bung bilong Forum Ikonmik Minista Miting long Rarotonga.  
"Cook Islands em i wanpela kantri long Pasifik we i soim strongim ikonomik gro gut, tasol em i nidim moa gro long kamapim gutpela sosel program na long save long wei bilong stap wantaim hevi bilong emigresen o we ol pipel i go lusim kantri," Andrea Iffland, Rijonal Dairekta bilong ADB Pasifik Liaison na Kodinesen Opis long Sydney i tok.  
"Rifom i rekomendim olsem dispela praivet sekta asesmen bai sanap antap long strongpela ikonomik faundesen i stap long hia long mekim isi long ol bisnis long gro."

Ripot i luksave long ol polisi eksen we i mas go pas na givim stratejik rekomen-desen bilong helpim kamapim gutpela ples bilong wokim bisnis. Ol hap we i nidim senis em long polisi transparensi, pablik sekta pefomens, bisnis entri proses, len maket, na kamapim gut rot bilong kisim ol fainens, strongim jenda ikwaliti, stretim ol infrastaksa sevis, kamapim gutpela ste-on enteprais, na long kamapim fremwok bilong kompetisen.  
Ripot i tok ol rifom long ol dispela eria bai mekim ikonomi kamap bikpela na helpim Gavman bilong Cook Ailans long kisim ol gol bilong sastenebol developmen insait long praive-sekta gro.  
Dispela ripot em i namba foa bilong faivpela praivet sekta asesmen (PSAs) Pasifik Praivat Sekta Developmen Inisetiv (PSDI) bai kamapim long dispela yia wantaim Papua Niugini, Samoa, Timor-Leste, na Solomon Ailans. Lukluk bilong PSA long ol institusen na polisi rifom i mas rausim ol samt- ing i save pasim rot long kamapim brod-bes praivet sekta gro.  
PSDI i wok wantaim 14 ADB Pasifik developing memba kantri long kamapim gutpela hap we ol bisnis i kamap na long kisim sapat bilong ikonomi we praivet sekta i go pas long en. Mani bilong dispela i kam long Gavman bilong Australia, Nu Silan na Esia Developmen Benk.

**Kirapim nupela haus  
wantaim ol diwai i pundaun**



Christopher Nipo wantaim las pikinini boi bilong em, baksait long tupela em hap bun bilong haus bilong tupela we Saiklon Pam i bin rausim (Credit: Sheryl Ho/UNDP).

**stori kam long  
UNDP Tanna, Vanuatu**

Christopher Nipo bilong Tanna Ailan long Vanuatu wantaim liklik famili bilong em i wok long kirapim gen haus na laip bilong ol isi isihain long ol i kisim taim long belhat bilong Tropikal Saiklon Pam long Mas 2015.  
Famili bilong ol i lusim olgeta samting bilong ol taim haus bilong ol i bin pundaun long strongpela win na sampela mun bihain gen paia i kukim bus hauskuk bilong ol we i bin gat ol simen beg na ol morata bilong haus i stap.  
Tanna Ailan em i gat 32,000 populesen na em i bin kisim bikpela bagarap tru long taim Saiklon Pam i bin kamap. Insait long ol mun i kam bihain, ol pipel i wok long stretim yet ol haus na stap bilong ol. Wanpela Non-gavman oge-naisesen (NGO), Camp Shining Light, wok patnasip wantaim Yunaitet Nesens Developmen program (UNDP) na Dipatmen bilong Lokal Atoriti (DLA), i wok long tanim ol traipela diwai we i bin pundaun long win long wokim timba bilong wokim haus, skul na komyuniti haus.  
Ol hap we ol i lukluk long en em long Middlebush, White Sands, West Tanna, Lenakel inland na North Tanna. I kam inap nau, somil i mekim wok long Lownamilo, Lapaclua, Lowkatai, Lamkail, Lawkatai, Ituga na Lowsula. Moa long en, Tafea Koles tu i kisim sampela timba long stretim gen ol haus bilong koles we i bin kisim bagarap tu.  
Somil operesen em i hap bilong UNDP Waste Management na Livelihood Recovery Inisetiv aninit long Saiklon Pam Recovery na Resilience

long Vanuatu projek. Olsem hap bilong dispela program, UNDP i wok patna wantaim DLA na ol arapela gavman ministri long strongim wok bilong kirapim gen laip bilong ol komyuniti bihain long saiklon.  
Long Tanna, ol lain long komyuniti i kisim trening long wes menesmen, we i bilong yusim mil na sefti proseda, na long luksave long ol wanem kain pipia em ol inap long yusim gen na long kisim bek ol timba na wokim kamap gutpela samting. Dispela program i kamapim tu awenes bilong ol pipel i no ken kukim ol diwai we i pundaun long taim bilong win, bikos dispela kain pasin i stap long Tanna.  
Tim Lida bilong Camp Shiring Light somil, Peter Moran na meri bilong wantaim wok bung bilong GCBC em i bin baim wanpela Warrior 8 ins Auto Swin Blade somil na salim long balus i go long Vanuatu, long sapatim wok bilong kirapim gen ples.  
Ol i sanapim mil na em i stat wok long mun Jun na insait long 4-pela de em i redi long wok.  
Wok bilong somil long Tanna i no wokim timba tasol long wokim haus tasol ol i katim ol narapela samting olsem ol bod, 150 sia, 35 tebol top, 30 bod bilong wasim klos, 4-pela tebol bilong klinim pis na planti moa paiawut.  
Tanna i gat planti sof-wud na ol hadwud we i kamap long bus bilong ol yet. Ol diwai we ol i bin stretim long somil em ol i bin kisim bek long Saiklon Pam na (nem long Bislama tok ples na Tok Inglis nem): hadwud ret/pink (Nafa, Natufua, Duai, Natuan, Ningat, Nimalben, Cedar); hadwud wait/braun (Nikyaben, Nikpat, Nisiap, Canoe tree)

ana sof/namel wud (Mango o Namiawul; wait wud o Namiawul).  
Mista Nipo i tok em i amamas long kisim inap timba long wokim gen haus we em yet wokim i stap.  
"Mipela i laikim planti moa komyuniti long kam insait long program na kamap papa long en," Mista Moran i tok.  
"Namba bilong ol pipel i wok long ol tripela somil operesen i go long 8-pela lain sapos ol i laik katim nupela rot long bus. Sampela taim ol meri tu i stap insait na ol i save kam long kain kain viles," em i tok.  
Mista Moran, i tok olgeta wok bilong katim bus em ol i wok long yusim ol bus naip wantaim helpim bilong ol senso long kamapim ples bilong sanapim ol somil o long kisim ol diwai i pundaun pinis. Wantaim foapela man long wanpela de, ol inap katim klostu 400 mita rot insait long bik bus. Ol i mekim liklik rot inap long wanpela bikpela pikap trak i ran long en.  
UNDP Weis Menesmen na Livelihood Recovery Inisetiv long Vanuatu i gat tupela hap: kliaim ol rabis na weist menesmen long ol eben o taun eria, na kamapim gen sindaun bilong lain long rurel ples.  
Antap long dispela wok bung bilong UNDP na DLA, Rasia Gavman i putim US\$500,000 i go bilong helpim projek long mekim wok bilong helpim ol lain i kisim bagarap long Tropikal Saiklon Pam long kamapim gut sindaun na long kisim strong na save bilong bihain taim hevi olsem.  
Ol bai yusim hap bilong dispela fanding long mekim wok bilong somil long Vanuatu i go bikpela.  
Mista Manele i bin givim notis long mekim mosen ia long wik i go pinis bihain long sevenpela minista bilong gavman i bin risain.  
Tasol Spika bilong palamen, Ajilon Nasiu i tok Mista Manele i bin tokim Klak bilong Palamen olsem, em i rausim dispela no gat bilip mosen.  
Nambawan samting we Spika i bin toktok long en taim sotpela miting bilong palamen tude long moning, olsem Hai Kot i rul long salens egensim di-

**Solomon Ailans i kisim no gat bilip vot**

**Sam Seke (Credit: ABC)**

LIDA bilong Oposisen long Solomon Ailans, Jeremiah Manele i rausim dispela mosen bilong nogat bilip long praim minista Manasseh Sogavare em ol i bin makim long toktok long en long las wik.  
Lida bilong Oposisen long Solomon Ailans, Jeremiah Manele i rausim dispela mosen bilong no gat bilip long Praim Minista Manasseh Sogavare we i bin laik holim long las wik.

Mista Manele i bin givim notis long mekim mosen ia long wik i go pinis bihain long sevenpela minista bilong gavman i bin risain.  
Tasol Spika bilong palamen, Ajilon Nasiu i tok Mista Manele i bin tokim Klak bilong Palamen olsem, em i rausim dispela no gat bilip mosen.  
Nambawan samting we Spika i bin toktok long en taim sotpela miting bilong palamen tude long moning, olsem Hai Kot i rul long salens egensim di-

sisen bilong em i tok orait long dispela mosen bilong no gat bilip long praim minista.  
Las wik Hai kot i bin harim dispela keis bilong no konfidens mosen we olgeta memba bilong Demokratik Kolisen bilong Senis, gavman bilong Praim Minista Sogavare i bin stap na harim.  
Spika Nasiu i tokim palamen olsem kot em i tingting pinis olsem, em bai no lukluk go insait na askim wanem samt- ing i go insait long palamen.

# Ol saveman i paul long wanem as balus i pundaun long Isip



**Dmitry Lovetsky na Vladimir Isachenkov – Asosietet Pres**

TOK HAIT na tingting planti i stap long las taim bilong balus bilong Rasia jetlaina we i pundaun nating long skai kam daun longwe tru long ples nating bilong Isip na i kilim olgeta 224 pasindia na ol kru insait.

Long Mande balus kampani i tokaut olsem pilot i no mekim rong o i no gat rong long balus, tasol ol eviesen opisa bilong Rasia i tok ol dispela kain toktok i kamap hariap tumas.

Sampela saveman bilong eviesen i tingting olsem i luk olsem i gat wanpela bom i mas stap insait long balus – Metrojet Airbus A321-200 i kam daun, na wankain taim ol narapela saveman i ting olsem i wankain long wanpela kain samting i kamap long yia 2001 taim wanpela balus i bin skrapim ranwe wantaim tel bilong em taim em kam daun long graun.

James Clapper, U.S dairekta bilong nesene intelijens i tok olsem nau yet i no gat klia piksa na evidens olsem i gat sampela teroris i mekim dispela samting, tasol ol i ting olsem no gut ol bikhet lain bilong Islamik Stet long

Sinai Peninsula i mekim.

“I luk olsem no gat, tasol mi no inap tok no gat yet,” em i tokim ol nius ripota long Washington.

Ol i askim mausman bilong Presiden Dmitry Peskov sapos dispela em i no wok bilong teroris, tasol em i tok: “I no gat wanpela rot bai ol i tok no gat yet.”

Metrojet balus i wok long plai long 31,000 fit mak antap long ples nating bilong Sinai taim em i pundaun long Sarere, 23 minit tasol bihain long em i lusim ples balus long Isip Red Si risot bilong Sharn el-Sheikh bilong St. Petersburg. Planti bilong ol pasindia i bilong Rasia.

Metrojet kampani i tok strong tru olsem pilot na balus i no gat rong long ol.

“Wanpela tok tasol em olsem wanpela samting long ausait i kamapim dispela bagarap long balus,” Deputy dairekta Alexander Smirnov i tokim nius konpres long Moscow.

Tasol namba wan eviesen opisal bilong Rasia, Alexander Neradko i tok kampani i no ken tok hariap nating.

Em i tok tok long TV nius long Isip olsem ol i ken mekim ol toktok bilong pundaun bilong balus bihain

long ol saveman i mekim wok painimaut long balus long wanem hap balus i pundaun long en.

Narapela deputi dairekta jeneral bilong Metrojet, Viktor Young i tok ol kru i no bin salim wanpela singaut i go long ol trafik kontrola olsem ol i painim sampela birua, pas-taim long balus i pundaun.

Ol saveman i tok wanpela balus taim em i plai yet na i paia em i save gat tripela as: wanpela em bikpela taim nogut long weta, o em i bam wantaim narapela balus long skai o sampela ausait samting i kamapim olsem bom o roket misail.

Wanpela lokal Islamik stet grup i tok ol i bin sutim balus i go daun, na em i pundaun long not said bilong Sinai we ol militari bilong Isip na sekyuriti fos i save pait wantaim ol militen long planti yia.

Tasol ol Rasia na Isip opisal i tok no gat long dispela. Tasol ol U.S na Jemani na Briten i save kisim tok lukaut long ples Sinai. Ol i save givim tok lukaut long ol lain long ol i no ken plai aninit long 26,000 fit na ol i no ken go long Sharn el-Sheik ples balus bikos ol ekstrimis vilens i save yusim ol samting bilong sutim ol balus.

# Hevi bilong smok nogut bilong Vokswagon i go bikpela

EPA i tok 10,000 moa Volkswagen kar i gat samting bilong haitim smok nogut i kamaut long ensin bilong kar.

EPA i tok olsem Volkswagon i putim iligel samting long 10,000 moa kar, na ol i tok em i helpim kampani long abrusim ol emisen stan-det bilong U.S. ol yusim ol emisen tes we ol kar sofwea bai i no inap long luksave. Dispela toktok i kam long ol investigeta olsem 3.0 lita disel kain bilong 2014 VW Tourareg, na 2015 Porsche Cayenn, na 2016 Audi A6 Quattro, A7 Quattro, A8, A8L, na Q5 i gat sofwea i no gutpela long kiln Ea Ekt. Em i mekim na bikpela moa mak bilong nitrogen oxide i go antap 9-pela taim moa winim standet bilong EPA.

Volkswagen US Sif i tok sori long ol lain i save kamapim ol lo long dispela bikpela asua we i mekim Volkswagen long i no wari long dispelaa lo na i go het

na haitim tok tru na wanem samting ol draiva i mas save long Audi Eksen Plen bilong Volkswagen.

EPA i tok dispela toktok i karamapim ol 10,000 pasindia kar we ol i salim pinis long U.S wantaim tu long sampela we namba i no klia tumas we ol i redim bilong 2016. Tasol tok i no klia tumas long hamas kar moa i stap long ol bai sekim yet.

VW i tok olsem ol i redi long larim ol investigeta long go sekim ol kar bilong ol.

“Volkswagen AG i laik tok olsem i no gat sofwea i stap insait long 3-lita V6 disel pawa yunit long senisim pasin bilong emisen long pasin hait we i brukim lo,” kampani i tok.

Tasol pastaim long dispela yia Volkswagen i bin tok aut olsem i gat moa long 482,000 narapela ol kar long U.S i brukim lo bilong emisen standet.

EPA i tok olsem taim ol kar we ol i tokaut long ol tude i pilim olsem ol wok long traim ol, ol i save wok long kain stail we EPA i kolim, ‘temperesa kondisening moud,’ we i save larim liklik emisen tasol long go aut. Tasol bihain long wanpela seken tasol ol save swis i go bek long ‘nomol moud’, we ol i save rausim olsem 9-pela taim mak moa nitrogen oxide polusen abrusim mak lo i putim.

“Polusen em yet em i save kamapim birua tasol em i ken kamapim ‘samting nogut olsem graun level ozone’ na salim aut samting we inap long kamapim sik asma o sotwin.” Ol opisal i tok.

“Klin Air Ekt Tel Paip standet i stap bilong banisim ol pablik helt long ol polusen nogut na long was gut long olgeta lain bilong wokim ol kar i bihainim wankain lo,” EPA Ekting Asisten Edministreta, Janet McCabe i tok.

# US Ami Vet helpim wanpela liklik meri bilong Nepal i wokabaut gen



**Scott Shulman i raitim**

WANPELA yangpela pikinini husat i kisim bagarap long guria long Nepal nau i wok long lain long wokabaut gen wantaim helpim bilong wanpela olpela U.S Ami soldia husat i mekim promis long helpim.

Shane Basi em i wanpela medik husat i kisim trening na em i pastaim memba bilong Oregon Nesene! Gat husat i bin wok long planti wok raun long Iraq na Afghanistan. Em i bin go long Katmandu long Ogas 2014 long lainim skul bilong Buddhiesem taim wanpela 7.8 megnitud guria i kisim Nepal, Basi kisim miletri trening bilong em na mekim wok, long sevim laip bilong yangpela Khendro Tamang husat i bin pas aninit long ol pipia bilong ol haus i bruk long bus ples bilong em.

Em i 6-pela mun tasol i go pinis taim guria i kamap long Epril 25. Basi wok long stadi long wanpela monasteri long Katmandu. Em wantaim planti narapela Amerika

sumatin i bin luksave na yusim ol save bilong ol long sevim laip. Ol i wokabaut i go long ples bilong Khendro insait long ol maunten hap moa long 9 aua lusim kapital siti. Taim ol i kamap long ples ol i lukim wanpela kain taim we olgeta samting i pinis olgeta. Planti manmeri bilong ples i stap long bikpela nid long medikal tasol ai bilong Basi i lukim yangpela Khendro husat i bin pas aninit long wanpela bikpela hap simen.

“Em i bin stap long mak nogut stret namel long 35 sikklain mipela i gat,” Basi tok.

“Wantaim mambu bet mipela i wokim, mipela kisim em na ol narapela 4-pela i go daun long maunten long Nepali ami beis na ol i kisim em long wanpela India helikopa i go long haus long Kathmandu,” em i tok.

“Em i bin hatpela taim tru long kisim em 6 aua moa long go,” Basil i tingim bek.

Long taim em wok long kisim marasin na kamap orait, Basi mekim promis long em bai stap sambai

long helpim Khendro. Em i yusim intenet na em i painim klostu long \$6,000 long helpim long wokabaut gen. Em i save go lukim ol famili bilong em planti taim long taim em i save go long klinik long pisikal terapi.

Bikos long gutpela pasin bilong Basi na long gutpela wok bilong pisikal terapit bilong Hendikep Intenesene! Khendro i wok long kamap orait.

“Mi laikim em i mas gat ol samting em i nidim long stap bilong em,” Basi i tok.

Khendro i wok long givim gutpela tingting long olgeta lain klostu long en. Gutpela smail bilong em na bel amamas bilong em i wok long helpim ol narapela husat i bungim hevi long kamap gut.

I no longtaim i go pinis Khendro i kisim namba wan giaman lek bilong em. Em bai planti mun yet long em i ken lain long wokabaut wantaim dispela giaman lek gut, tasol em i amamas tru na i wok hat wantaim terapit bilong em olsem wanpela 7 yia pikinini tasol inap long mekim.

# U.S soldia bilong balus i wanbel long ol trup stap yet long Afghanistan

**Cindy Smith Pat O’Gara na Anna Bradlee i raitim**

KEPTEN Taylor Valentine, wanpela asples bilong Mississippi nau i wok long pinisim wanpela 6 mun raun bilong em wantaim Ea Fos long Kabul, Afghaistan.

Valentine husat i greduet long Ea Fos Akademi long 2006 em i wanpela we i no save marit na i tok em save laikim laip bilong wok long narapela kantri na em i laik go bek gen long Novemba long namba 5 raun bilong em. Dispela em i bihain long Presiden Obama i tok long ol militri bai stap yet long kantri no longtaim i go pinis.

“Taim mi harim tok save i kam long Presiden mi kisim bikpela bel isi na amamas liklik bikos mi ting olsem samt-

ing yumi mekim long hia em i gutpela pasin,” Valentine i tokim ABC Nius’Martha Radatz Kabul.

“Ol i nidim yet edvais na helpim bilong yumi, olsem na mi harim olsem mipela bai stap yet moa mi ting em i gutpela samting long ol Afghan na olgeta hap long wol,” em i tok. “Long ol U.S Trup long Afghanistan, wanpela Misin bilong birua i go het yet,” Presiden Obama i bin tok long ol tausen trup bai stap long Afghanistan i go long 2016 na ol yia i kam bihain.

Long wanpela pres konpres long Oktoba, Presiden i tokaut olsem U.S bai larim 5,500 trup long ol wan wan beis long Bagram, Jalalabad long Is na Kandahar long Saut,” tasol em i no sapotim tingting bilong wanpela pait i

no save pinis.

Long taim Valentine i stap long fil em i bin lukim sampela bagarap tu. Long namba wan taim em i go, bes pren bilong em 1st Lt. Roslyn Schulte i bin dai taim wanpela IED (Improvised Explosive Device) i pairap na kilim em. Valentine, em i wanpela Ea Fos Ordines Disposal (EOD) teknisen, i tok tu olsem planti EOD teknisen i bin dai pinis insait long dispela pait.

Valentine i tok moa olsem, “Ol pipel husat i wok long tok, mipela i mekim wanem samting na stap yet long hia, mi laik tokim ol olsem mipela i gat bikpela bel isi long helpim ol pipel bilong Afghanistan na i no long ol tasol, ol narapela pipel long wol tu long sefti na sekyuriti, we mi ting em i bikpela samting long olgeta i mas gat.”

# PM O'Neill amamas long Fores Minista



**Praim Minista O'Neill i sindaun namel wantaim Fores Minista Douglas Tomuriesa wantaim ol arapela fores minista bilong ol APEC kantri.**

**PRAIM Minista Peter O'Neill i amamas na tok tok tenyu long Fores Minista Douglas Tomuriesa long bungim ol wan wan fores minista bilong ol APEC memba kantri na holim miting long PNG.**

Praim Minista O'Neill em yet i go pas long toktok wantaim APEC. Long yia 2018, bikpela APEC miting bai kamap long PNG.

APEC em i minim Asia-Pasifik Ikonmik Komyuniti we PNG em i wanpela memba kantri bilong en bikos em i stap insait long Asia-Pasifik rijon.

Dispela bung em i namba 3 miting bilong ol fores min-

ista bilong ol APEC kantri na wanpela as bilong holim dispela bung em long kirapim na lukautim fores sekta bilong ol wan wan kantri memba bilong APEC.

"Mi amamas olsem ol minista bilong fores insait long Asia-Pasifik rijon i wanbel na amamas long lukautim ol fores o bus bilong yumi i go inap 2020 ol wan wan APEC memba kantri bai lukautim moa long 20 milien hekta bilong bus," Mista O'Neill i tok bihain long dispela miting.

"Mipela i mas wokbung wantaim long planim moa

diwai na lukautim planti fores o bus. Yumi mas wokbung wantaim long stopim ol kampani husat i wok long stilim ol diwai na kamapim ilegal loging insait long wan wan kantri bilong yumi," Mista O'Neill i tok.

Em i tok PNG wantaim ol arapela APEC kantri bai wokbung wantaim Asia-Pasifik Netwok bilong Sastenabel Fores Menesmen na Rihabilitesen long strongim rijonol treid long ol sustenabel forestry prodaks.

"Mi laik tok tenkyu long Fores Minista bilong yumi,

Douglas Tomuriesa long bungim ol rijonol fores minista na kamapim gutpela toktok long mekim sampela gutpela samting long ol fores bilong Esia-Pasifik rijon, "Mista O'Neill i tok.

Narapela kibung bilong APEC we PNG bai holim em i APEC Bisnis Edvaiseri Kaunsil Miting na Trempotesen Woking Grup. Dispela tupela bung wantaim bai kamap long yia 2016.

Dispela miting bilong APEC Fores Minista em i kamap long Pot Mosbi long 27-29 Oktoba 2015 na em i namba 3 miting bilong ol minista bilong fores tasol.

## Nambawan Supa i apim namba bilong brens

NAMBAWAN Supa i wok long apim namba bilong ol brens bilong en insait long kantri. Nambawan Supa nau i gat moa long 30 brens long PNG.

Pastaim em i bin gat 17 brens tasol. Dispela bai mekim wok bilong sevim ol memba i kamap isi tru.

Dispela 17 brens long ol provinsal kepitai i save sevim 60, 000 pablik sevan long distrik level. Dispela i karamapim 40, 000 tisa, 5, 000 polis, 5,000 haus sik wok manmeri, na 10, 000 pablik sevan long distrik level.

Dispela ol manmeri i save kisim taim long go kisim sevis long brens bilong Nambawan Supa i stap long ol kepitai bilong ol wan wan provins bikos long sampela hap rot i save bagarap, mani mak bilong kisim PMV i save go antap na ples i save long we tru.

Long larim ol pipel i kisim sevis long haus dua stret, Nambawan Supa i toktok long opim nupela brens long Arawa, Daru, Kerema, Tari, Kainantu, Ramu, Narmatanai, Misima, Maprik,

Aitape, Bulolo, Lihir, Biala/Hoskins, na Kokoda.

Nambawan Supa bai opim ol dispela nupela brens bihain long ol i trenim ol wok manmeri na kirapim ol samting opis bilong ol. Dispela bai kamap insait long 24 mun o klostu long wanpela yia.

Wanpela as long Nambawan Supa i sainim agrimen long wok wantaim Post PNG em bikos Post PNG i gat brens long olgeta hap ples insait long PNG.

Dispela bai mekim isi long Nambawan Supa i yusim ol opis na samting bilong Post PNG long sevim ol memba o ol kontributa bilong Nambawan Supa.

Nambawan Supa bai larim ol wok manmeri bi-

long Post PNG long olgeta hap bilong kantri na i go aut long sevim ol memba bilong ol.

Ol dispela wok manmeri bilong Nambawan Supa i bin kisim trening long sevim ol memba na ol bai mekim gut wok long sevim ol manmeri.

Long ol dispela nupela brens we Nambawan Supa i tingting long kirapim, ol wok manmeri bai kisim gutpela trening long sevim ol Nambawan Supa memba.

Nambawan Supa bai trenim sampela wok manmeri bilong Post PNG husat bai helpim ol wok manmeri bilong en long ol dispela nupela brens long olgeta hap bilong kantri.

Ol dispela nupela brens bai larim ol memba i kisim gut sevis klostu long ples we ol i save stap.

# Pasifik Marin Pak long Madang bai op

OLGETA samting i redi long Praim Minista Peter O'Neill bai go long Madang long opim konstraksen bai stap long Pasifik Marin Industriai Zon (PMIZ) long Mande 23 long dispela mun.

Minista bilong Tred Komes na Industri, Richard Maru, i tokaut olsem ol kot i pinis na ol i rausim ol keis na Saina Exim Benk bai givim dinau gen na bai ol i go het long opim.

Em i tok tenkyu long Tre-

sera, Patrick Pruaitch long sainim dispela saplimentari dinau agrimen wantaim Saina Exim Benk long go het bikos long tripela yia i bin lus pinis.

Minista Maru i tok nesene gavman i tokim kontrakta,

Saina Shenyang Intanesenel olsem em i mas pinisim projek insait long 12-pela mun taim projek i stat.

"Nesene Eksekutiv Kaunsil (NEC) i makim ol praiwet sekta patna long givim wara na pawa bilong PMIZ projek aninit long Pablik Praiwet

# Kamapim Nesene treid polisi

MINISTA bilong treid, Komes na Industri, Richard Maru i tokaut olsem Ministri bilong em na Dipatmen bilong treid, Komes na Industri i wok wantaim ol namba wan stekhoda long kamapim nesene treid polisi bilong Papua Niugini.

Em i tok ol gavman pastaim i no bin toktok long dispela samting bilong intanesenel treid gut na larim i stap insait long sistem bilong gavman. Dispela i kamapim ol polisi i no gat lain na wokbung namel long ol bikpela stekhoda na praiwet sekta.

Minista i tok ol gavman i kamap bihain i go het long senisim ol polisi long intanesenel treid na mekim treid isi we mekim PNG i no bin inap long kisim sans i stap insait long ol membasip long kanikain ol intanesenel agrimen.

PNG i memba bilong Wol Treid Ogenaisesen (WTO) na ol narapela rijonol hap bilong treid olsem APEC, na ol liklik rijinol grup olsem Melanesia Spiahet Grup (MSG), tasol mipela i go het long sot long treid wantaim ol

narapela bikpela treid patna long rijon na wol.

Minista Maru i tok Dipatmen bilong em i wok bung wantaim Yuropian Yunien (EU) long karim aut rijinol na nesene konsaltesen long kisim tingting bilong olgeta bikpela stekhoda, ol gavman dipatmen, ol ejensi na praiwet sekta long developim wanpela treid polisi na wanpela nupela treid Ekt long kamapim nupela treid opis aninit long long Ministri long mekim wok bilong nesene treid polisi.

Em i tok Dipatmen i wok long pinisim draf treid polisi we bai i go long gavman bilong glasim gut bipo long ol i pinisim.

"Taim ol i tok orait na opim dispela polisi bai i kamapim nesene fremwok bai i senisim ol wok bilong treid insait long Ministri bilong treid, Komes na Industri na mekim gut wok bung namel long olgeta ogenaisesen i save karimaut treid, ol gavman ejensi na praiwet sekta long PNG long mekim gut long nem bilong kantri," Minista Maru i tok.

# Risos sekta bilong PNG i laikim senis

MAINING, oil, na ges sekta bilong Papua Niugini i go het long senisim kantri wantaim nupela softwea na teknoloji long mekim wok hariap na mekim gut, Sif Eksekutiv Opisa bilong SosPasifik, Pierre Elias i tok.

Dispela ol toktok i kamap taim Mista Elias i bung wantaim sampela bikman long risos sekta long Papua Niugini taim em i kam long PNG long dispela wik.

SosPasifik em wanpela kampani i save salim kain kain stail softwea na teknoloji we i save operet long Esia na Saut Pasifik. Em kampani bilong Kwinslan na ol i save operet na ol i save wok wantaim rijinol stretejik alaiens patna na ol gutpela edvaisa long givim ol lokal save bilong ol kampani.

Taim risos sekta long PNG i amamas long rekotim gro bilong kampani bikos long ges prodaksen. Mista Elias i tok dispela i kamap wankain long wol komoditi prais i pun-

daun na global maket i senis hariap.

'Global softwea na teknoloji spes i go het long raunim na painim aut ol rot long bikpela operesen. Wanpela lukluk long nau em long holim strong Intanet Of Tings (IoT) na Sering Ikonomi, we tupela yusim infomesen teknoloji long kisim na senisim infomesen i larim bilip bilong ol samting.

'Em i karim ol wok i no gat pepa, ol menesmen softwea o yusim GPS long painim ol woklain o ol samting, bikpela tingting em long sevim taim na mani,' em i tok.

'PNG i stap long strongpela posisen bikos taim ol projek long narapela hap long wol i kisim taim wantaim ol olpela teknoloji, long hia ol kampani i tingting long developim nupela ol teknoloji. Long dispela, mipela i lukim PNG i go het long ol narapela sekta autsai long maining, oil na ges we ol i kamapim kliia na senis.'

Patnasip (PPP) Polisi bilong gavman. Ol lain i go pas bilong Agrimen bilong dispela projek bai i sain long narapela wik wantaim Oil Search Limited long givim pawa i go long PMIZ taim Water PNG bai givim wara," Minista i tok.

Em i tok taim projek i pinis em bai kamapim 20 tausen

wok bilong ol pipel long Madang provins, givim ol bikpela wok na takis i go long gavman na apim ekspot veliu bilong pis long Papua Niugini i go antap long K2 bilien we pastaim yumi i save lus long olgeta yia, bikos ol pis bilong yumi i go aut long kantri.

# Nupela lo bai lukautim POMSoX

**POT Mosbi Stok Eksens (POMSoX) bai gat nupela lo na olupela lo we gavman i bin kamapim long yia 1997 bai no moa stap long lukautim ol bisnis na stok maket long kantri.**

Tred, Komes na Industri Minista Richard Maru i mekim dispela toktok las wik taim em i pasim wanpela lo bilong kirapim stok maket, kapital maket na derivetiv maket long PNG.

Minista Maru i tok dispela nupela lo bai larim planti manmeri i investim mani long sea maket na bai kirapim kepitel maket bilong PNG.

Dispela lo bai tu larim Sekyuritis Komisen of PNG i kamap olsem narapela gavman ogenesesen. Em bai no moa stap aninit long Invesmen Promosen Atoriti (IPA) ov PNG.

Mista Maru i tok ol dispela nupela lo bai larim planti manmeri PNG baim na salim

sea long stok maket na tu em bai larim planti ol liklik kampani long kirapim mani sapos ol i nidim mani long kirapim bisnis.

"POMSoX em i no op. Mani maket long POMSoX em i tait tumas. Em i no save larim ol praivet na indiviual investa i baim na salim sea long POMSoX," Minista Maru i tok.

Em i tok dispela nupela lo bai larim planti manmeri i baim na salim sea long planti kampani. Mista Maru i tok long PNG ol liklik kampani i save painim hat long gro bikos mani maket em i liklik stret.

"Sapos ol liklik kampani i laik gro na sapos ol i painim ol dinau mani o arapela mani long mekim bisnis bilong ol i go bikipela, ol i ken go kisim mani long kepitel maket."

"Long PNG kepitel maket bilong yumi i no strong tumas bikos lo bilong kepitel maket i no strong."

"Lo mipela i yusim nau i

bin kamap long yia 1997 na dispela em i longpela taim tumas. Olsem na long dispela as, gavman i senisim ol dispela lo na larim nupela lo i kamap long senisim mani maket long PNG," Minista Maru i tok.

Em i tok PNG i gat planti risos olsem gol, ges, wel, kopa, na ol arapela risos tasol long kirapim bisnis long ol dispela risos, ol foren kampani i save go painim mani long ol arapela mani maket long arapela kantri.

Taim dispela nupela lo i kamap planti ol kampani husat i painim mani long kirapim bisnis bilong ol i ken kisim mani long kepitel maket bilong yumi yet.

"Nau ol institusional investa tasol i save baim na salim sea long POMSoX. Dispela nupela lo i bai larim planti ol manmeri olsem yumi i kamap praivet investa long POMSoX," Minista Maru i tok.

# No ken yusim LNG mani long kisim mo dinau

**Hela Gavana Anderson Agiru na Praim Minista Peter O'Neill i go lukim PNG LNG Plent sailt au-sait long Pot Mosbi.**



HELA Gavana Anderson Agiru i salensim Praim Minista Peter O'Neill long no ken yusim LNG mani olsem sekyuriti long kisim moa dinau mani.

Gavana Agiru i tok LNG mani i mas kirapim bisnis na ol arapela bikipela hai impek projek olsem rot, ples balus o sip bris long kirapim ikonomi bilong PNG. Em i tok gavman i no ken yusim dispela mani long kisim moa dinau mani we ol pipel bilong PNG long bihain taim bai kisim bikipela hevi long bekim.

Mista Agiru i tok bisnis divelopmen gren (BDG) mani bilong ol papagraun i mas kirapim planti nupela bisnis long Hela Provins na 4-pela arapela provins we PNG LNG Projek i pas long en.

Ol dispela 4-pela provins em Sauten Hailans, Westen, Galp na Sentral provins we PNG LNG Projek i stap long en.

Mista Agiru i tok gavman i no ken yusim LNG Projek long kisim moa dinau mani taim ol dispela 5-pela provinsal gavman na moa long 600, 000 papagraun i wet yet long kisim royalti mani na BDG mani bilong ol.

"Mi wanpela man husat i bin plen long kirapim dispela K43 bilien PNG LNG Projek. Tingting bilong mipela long

kamapim dispela bikipela ges projek em long larim PNG i kisim ikonomik benefit na long divelopim kantri bilong yumi.

"Mipela i bin laikim PNG i mas yusim dispela sans long LNG projek na kirapim kantri. Mipela i bin laikim ol manmeri long PNG i kisim benefit olsem wokmani, kisim save na mekim bisnis.

"Mipela i no bin kamapim dispela projek long larim gavman i yusim olsem wanpela sekyuriti long kisim moa dinau mani. Sapos dispela i kamap, ol manmeri PNG long bihain taim bai kisim bikipela taim long bekim ol dispela dinau mani na no gat wanpela divelopmen bai kamap," Mista Agiru i tok.

Oposisen Lida Don Polye i sapotim Gavana Agiru na salensim gavman long no ken kisim moa dinau mani long nem bilong LNG mani.

"Mipela i save olsem gavman i laik kisim K2.5 bilien sovren bond dinau mani long nem bilong LNG mani. Mi singautim ol gavana bilong Sauten Hailans, Westen, Galp na Sentral provins long bungim han wantaim Hela Gavana long stopim dispela plen bilong gavman long kisim dispela dinau mani," Mista Polye i tok.

Mista Polye i tok gavman i

no ken paulim na giamanim ol papagraun bikos gavman i stap long helpim ol pipel na mekim gutpela samting long senisim laip bilong manmeri.

"Wok bilong gavman long olgeta kantri em long lukautim pipel na mekim ol gutpela samting long larim laip bilong ol manmeri long kantri i stap gut na ol pipel i amamas na stap gut.

"Tasol Praim Minista O'Neill i wok long bagarapim nem bilong gavman taim em i no bihainim laik na tingting bilong pipel. Ol papagraun bilong LNG projek em ol pipel bilong dispela kantri we gavman bilong O'Neill-Dion i mas lukautim long en," Mista Polye i tok.

Em i tok gavman i giamanim ol papagraun olsem mani bilong ol i stap long Benk ov PNG tasol tru tru mani bilong ol papagraun i no stap long Sentral Benk.

"Mi save olsem ol royalti mani bilong papagraun i no stap long BPNG. Mani we PNG inap long kisim olsem skel bilong en long 19.6 pesen sea gavman i gat aninit long NPCP o Kumul Petroleum i wok long i go insait long wanpela eskro benk akaun long Singapo na kantri i no kisim yet skel bilong LNG mani," Mista Polye i tok.

# MRDC givim kaikai long ol Tabubil manmeri



**Ol wokman long Tabubil ples balus i rausim ol beg rais saplai i kam ausait long Hevilift balus.**

WANPELA sabsideri kampani bilong Mineral Risos Divelopmen Kampani (MRDC) i givim ol kaikai na rilif saplai i go long ol manmeri bilong Tabubil na Ok Tedi eria.

Ol manmeri bilong Tabubil na Ok Tedi eria i bin kisim bikipela taim bihain long ples i drai na no gat ren.

Dispela El Nino birua i kamap long olgeta hap bilong kantri tasol long Tabubil na Ok Tedi eria, ol manmeri i kisim bikipela bagarap na gavman i pasim Ok Tedi kopa main bikos mak bilong Flai Riva i go daun stret.

Dispela i mekim hat long ol sip i karim kaikai saplai na ol arapela saplai bilong Ok Tedi manining tu. Mineral Risos Sta Mauntens

(MRSM), husat i wanpela sabsideri kampani bilong MRDC i bin givim ol kaikai na rilif saplai long K150, 000 i go long 10-pela viles arere long Ok Tedi long Not Flai Distrik.

MRSM i salim beg rais, tin pis, bisket, wara botol na ol arapela kaikai we ol manmeri i save kaikai olegta de.

Dispela El Nino birua i bagarapim laip bilong ol manmeri long Ok Tedi na Not Flai eria bikos ples i drai nogut tru na dispela drai sisen i daunim level o mak bilong Flai Riva i kam daun tru.

Ol manmeri Kiunga, Tabubil na Ok Tedi eria tu i save kisim kaikai na ol arapela saplai bilong ol long Flai Riva tasol taim wara level i go daun, ol tu i kisim bikipela taim.

Bipo las wik wanpela asesmen tim bilong MRDC i bin go lukim na skelim bagarap long Ok Tedi eria na ol i bin painimaut olsem ol pipel i kisim bikipela bagarap bikos ol kaikai olsem rais, tin pis na mit, wara botol na ol arapela kaikai i pinis long ol stua long Tabubil.

Hevilift balus long kisim 4 tan rais beg na ol arapela kaikai i go long Tabubil las wik Fonde. MRSM i baim sampela kaikai tu insait long Tabubil yet na bihain ol bai skelim ol dispela kaikai long manmeri insait long Ok Tedi komyuniti.

MRSM i tok tenkyu long Hevilift balus kampani i helpim ol long karim ol dispela kaikai saplai fri ov sas we MRSM i no baim wanpela mani long sata balus.



**Sampela ol beg rais long Jeksens ples balus long Pot Mosbi i redi long balus i kisim ol i go long Tabubil.**

# Sans Madang-Saidor rot-sait maket long drai sisen

James G. Kila i raitim

PLANTI ol rural viles we i stap namel long Madang na Saidor rot i wok long wokim ol bet-maket sait long rot long salim ol kulau na ol arapela samting long lain husat i yusim rot i go kam.

Long las yia na ol yia pastaim ol kar i no save yusim Madang-Saidor rot bikos i gat ol bikpela wara i stap na save pasim rot long ol kar i ron i go kam. Ol bikpela wara olsem Yowor, Minjeng, Guabe, Gawar na Yaganon i save givim hat taim tru long ol kar long abrusim.

Bikos nogat kar i save ron long Madang-Saidor rot, ol manmeri i save kalap long moto na go kam long Madang taun long baim i samting na tu wokim bisnis.

Nau em taim bilong san na drai sisen na ol bikpela wara i drai na ol kar i ron i go kam. Olsem na ol manmeri long ol ples arere long rot tu i wokim liklik ol rot-sait maket na salim ol kaikai na kulai long stretim nek drai bilong ol manmeri i ron long kar.

Sampela ol viles lain we pastaim i no save gat sans long wokim mani nau i wokim mani bikos em drai sisen na ol laki stret.



Poto ya i soim ol yangpela man long ples Sakwanam long Raikos i wokim rot-sait maket na salim kulau na buai long ol ran long kar i go kam long Madang-Saidor rot.

Ol lain wok manna meri bilong EMPNG volentia na klinim Kaimari Maket.



## Ol EMPNG Volentia i klinim Kaimari Maket

WANPELA tim wantaim 35 volentia bilong ExxonMobil PNG Limited (EMPNG) i bin wokim wanpela klinap long Kaimari Maket klostu long Moro insait long Sauten Hailans Provins.

Pastaim long ol i statim klinap, ol tim i soim ol jeneral senitesen prektis na long lukautim envaironmen bilong ol.

EMPNG Komyuniti Afeas Opisa, Steven Kadam i tok, "mekim wok olsem volentia i save givim sans long wokfos long mekim sampela komyuniti wok long gutpela wei long soim strongpela kalsa

bilong timwok, na strongim mipela yet long givim samting i go bek long ol komyuniti."

Em i tok tenkyu long Oil Search Limited long larim ol long yusim weis disposal menesmen eria, Mananda Umbrella Join Vensa long givim wanpela dam trak long EMPNG na ol tuls bilong wok. Ol narapela lain tu olsem Mewayo famili na lokal envaironmen grup, Wildlife Menesmen Atoriti i bin bung wantaim ol volentia woklain.

"Strongim timwok long komyuniti wok i stap yet olsem

namba wan we bilong lukautim envaironmen we yumi olgeta i save stap na amamas long en," Kadam i tok.

Kaimari maket em olgeta lain komyuniti bilong Kutubu na Moran eria i save yusim.

Dispela maket i save givim mani long ol fama long ol ples i stap klostu taim ol i save salim ol kumu na ol kuk kaikai samting.

Julie Mewayo i makim ol papa bilong Kaimari Maket, Moses Mewayo na i tok welkam long EMPNG tim na tok klinap i soim wanpela we bilong bung wantaim na lukautim envaironmen.

## Bikman bilong Korea i kam long Lihir

Tony Sapan i raitim

Man i makim gavman bilong Saut Korea long Papua Niugini, Embeseda Kim Seong Choon i lusim Lihir long Fraide bihain long wanpoela de lukluk raun long ailan long Fonde.

Taim em i stap long Lihir Embeseda Choon i bin go lukluk raun long Nimamar lokal level gavman na Bos bilong Lihir Gol Main, Craig Jetson.

Taim em i bungim bos bilong Lihir Gol Main em i bin tok kliia long wok bilong main. Bihain long dispela em i mekim lukluk raun long Proses plent, Geothermal Pawa stesin wok long main na stokpail na Weis Mentemen eria.

Embeseda Choon i pinisim wokabaut bilong em i kam long Lihir long mekim lukluk raun long pik na Kakaruk didiman projek namel long tri na foa kilok long Fonde apinun.

Em i go bek long Pot Mosbe long Fraide moning.

Ol fiseris opisa wantaim Dongwon Industries opisal i sainim agrimen long ai bilong Ekting Gavana Jeneral, Theo Zurenuoc long aste Trinde 4 Novemba.



NESENEL Fiseris Atoriti na wanpela kampani bilong Korea ol i kolim Dongwon Industries, i sainim Dongwon Tuna Projek Agrimen long Gavman Haus, asde Trinde Novemba 4.

Dispela invesmen inap long mak bilong US\$35 milien bai givim wok long 2,000

pipel na 4,000 arapela wok long ol pipel bilong Morobe Provins. Dispela projek bai kamapim tu ol sait of bisnis long Lae siti.

Dispela invesmen bai kamap namba 6 pis faktori na bai prosesim 200 mektrik ton tuna long wan wan de na kamapim tuna loin na tin tuna bilong domestik na intenesenel maket.

Minista bilong Fiseris, Mao Zeming i tok long taim ol dispela projek i kamapim komesel wok, bai ol i prosesim moa long 1,000 metrik ton pis long wan wan de na bai givim wok long 10,000 lokal pipel.

Dongwon Industries em i wanpela bikpela tuna kampani na pis prosesim kampani long Korea. Em i gat 15 tuna pes seine bot hia long solwara bilong PNG na PNA na long arapela hap tu. Dongwon Tuna Projek Agrimen i opim rot bilong han kampani bilong en, Bulolo Fisheries Limited, long oporetim 10 pes seine bot long

PNG aninit long lokal foren plak long saplaim pis i go long ol tuna faktori bilong en.

Nesneel Fiseris Atoriti bai givim laisens long ol dispela bot aninit long Bulolo Fiseris Limited na bai i mas bihainim lo bilong vesel de skim na nupela Tuna Manesemen Developmen Plen.

Bounty Seafoods Limited bai lokal han bilong Dongwon husat bai prosesim ol tuna loin na tin tuna. Em i namba wan kampani bilong Korea long invest long shore-based tuna prosesing faktori long PNG.

Gavman Polisi i sapotim 100 pesen tuna long ol faktori we ol i kamapim arapela prodak long salim i go long ol ovasis maket. Stat long 2016, olgeta tuna ol i kisim long solwara long dispela eria bai ol i prosesim long PNG yet. Bai kantri i no inap long salim moa tuna pis i go ovasis long ol arapela kantri i wokim tin pis o ol arapela prodak long en.



# Ramu NiCo Givim K500,000 long Ramu Developmen Faundesen



Ol lain wokman bilong Madang Developmen Faundesen na Ramu NiCo (MCC) i sanap soim sek-mani long piksa.

opmen patna insait long Madang provins. Mista Alo i tok Gavman i luksave long planti ol gutpela helpim na ol sapot Ramu NiCo(MCC) i givim long provins stat long 2005 i kam, na em i laikim dispela sapot i mas go het yet wantaim RDF. Mista Alo i tokaut olsem Madang provinsal gavman long ol yia pastaim i no wok klostu tumas wantaim Ramu NiCo (MCC). Tasol kamap bilong Ramu Developmen Faundesin (RDF) em gutpela rot tru we bai lukim Kampani i wok klostu wantaim Madang provinsal gavman. "Mi gat bilip long Ramu Developmen Faundesin bikos no gat ol politiks bilong gavman bai go insait long kontrolim wok bilong en," Mista Alo i tok.

**RAMU NiCo Menesmen (MCC) long Sarere, Oktoba 24 i givim K500,000 long helpim wok operesen bilong nupela opis Madang provinsal gavman i kamapim ol i kolim long Ramu Developmen Faundesin (RDF).**  
Dispela mani sapot bilong Ramu NiCo (MCC) i go aninit long Rivais Ramu Nikel Projek memorandum ov agrimen (MoA) bilong 2013, na dispela helpim i go olsem sid kepitol o mani-helpim long kirapim na menesim RDF. Madang Provinsal Gavman (MPG) i kirapim RDF wantaim as-tingting long kirapim ol projek wantaim ol mani helpim i kam long Ramu NiCo Projek olsem Spesel Sapot Gren (SSG) Takis Kredit Skim na ol arapela. Vais Presiden bilong Ramu NiCo (MCC), Wang Baowen, pastaim long em i givim dispela K500,000 sekmani i

tokaut olsem Ramu NiCo i bilip long pasin bilong wok bung wantaim Madang provinsal gavman na ol arapela gavman dipatmen na tu ol stekholda insait long Projek long helpim Madang provins. Tasol em tok olsem pro-daksen bilong Ramu NiCo i kamaut wantaim planti salens tru. Em i kamap insait long taim we prais bilong metal insait long wok i daun-bilo tru, na rot na ol infra-straksa long projek eria tu i no gutpela tumas na tu i gat ol arapela sosel hevi tu i stap. "Planti ol bikpela developmen i kamap long Madang provins na tu long PNG. Tasol wok i stap yet long stretim gut ol rot na bris long planti hap long helpim planti ol pipel long kantri," Mista Wang i tok. "Mi bilip olsem Ramu Developmen Faundesin i ken wokim sampela wok long

bringim ol sevis i go long ol pipel," Mista Wang i tok. Deputi Jeneral Menesa bilong Komyuniti Afes (CA) Dipatmen bilong Ramu NiCo, Mista Yuan Zhi i tokaut olsem i gat spesel nid i stap long lukim Gavman ol sevis i go long ol komyuniti insait long projek eria bilong Ramu NiCo Usino-Bundi na Raikos distrik long Madang provins. Olsem na dispela nupela faundesin bai helpim long bringim kain helpim o sevis i go long ol pipel. Mista Yuan i tokaut tu long dispela taim olsem i gat 13 projek aninit long Ramu Projek MoA em Madang provinsal gavman i no wok long en yet. Mista Yuan i tokaut tu olsem i gat ol infrastrakta (rot na bris), edukesen, ekonomik developmen program, komyuniti developmen na sastenabol developmen program aninit long

MoA em MPG i mas wokim, tasol nau nupela faundesin bai wok long developim. Provinsal Edministreta bilong Madang, Daniel Alo i

husat i kisim sek-moni makim Ramu Developmen Faundesin (RDF) i tok tenkyu long Ramu NiCo (MCC) long stap olsem wanpela bikpela divel-



Vais Presiden bilong Ramu NiCo, Wang Baowen i givim K500,000 sek-moni i go long Madang provinsal edministreta, Daniel Alo i.



**Ramu NiCo Management (MCC) Ltd,**  
the manager of Ramu NiCo Project is proud to host the 5th  
**NATIONAL MINING EMERGENCY RESPONSE CHALLENGE**  
in Madang  
Date: August 22-25, 2015  
Venue: DWU & PNG Maritime College



# Nu Silan i strong tumas

**NU SILAN All Blacks i bin strong nogut tru long Ragbi Wol Kap fainel na i kamap namba wan long Twickenham pilai graun taim ol i daunim pawa bilong ol Australia Wallabies we skoa i bin sanap olsem 34-17.**

Ol ekspiriens na bipo pilai bilong Nu Silan i pilai isi long soim kala bilong ol na i no wari tumas long ol Australia husat i ran strong long namba tu hap bilong pilai.

All Blacks i bin kisim wampela 50 mita penelti gol na las tupela trai bilong Dan Carter Beauden Barrett i bin pasim namba 3 Wol Kap win bilong ol.

Carter i bin kisim prais bilong namba wan pilaia long dispela pilai bikos em i bin kikim 4-pela penelti gol, tupela konvesen na drop gol em i bin kisim long las minit.

Dispela prais em i bekim bel kros bilong em long 2011 fainel we em i no bin pilai bikos em i bin kisim bagarap.

Win bilong ol i kamap bikos Carter na namba wan poro

pilaia bilong em, Richie McCaw, i bin pilai gut na ol go aut long Ragbi Wol Kap pilai graun wantaim sempionsip.

"Mi singaut long bal. Mi bin singaut na tok Go! Go! Go. Na mi kisim bel isi taim bal i go insait," McCaw i tok.

Trai bilong Nehe Milner-Skudders i bin kamap taim ol i go insait long namba tu hap bilong pilai i soim olsem ol Nu Silan i bin go pas long pilai. Dispela trai i bin kamap bikos McCaw i bin pasim bal gut na ol i bin skruim skoa.

Ol Wallabies i strongim banis bilong ol tasol ol i sotwin tumas bikos All Blacks i go pas wantaim planti poin long namba tu hap bilong pilai.

Pilaia bilong Nu Silan, Ma'a Nonu, i bin lukim malomalo banis bilong ol Australia na em i bin ran strong na i krungutim birua pilaia, Kurtley Beale, na i bin putim namba tu trai bilong ol Nu Silan.

Dispela taim, ol Wallabies i bin belhat pinis na i laik pait bek tasol, ol i no gat inap strong na i lus pinis.

Pul Bek bilong ol Nu Silan, Ben Smith, na David Pocock i bin mekim asua na ol Wallabies i bin gat sans long dispela taim bilong skruim skoa bilong ol liklik.

Wallabies i bin kisim strong liklik na putim birua bilong ol long bikpela presa, taim Tevita Kuridrani i kisim sapot long Will Genia na i putim namba tu trai na i bungim wankain poin bilong All Blacks taim Bernard Foley i kikim konvesen i go insait.

Ol Nu Silan i stap isi tasol na brukim ol Australia i go ausait long gem bikos Cater i bin kisim 6 poin long las minit.

Kosa bilong ol Australia, Michael Cheika, i tok, "Mi amamas long ol boi bilong mi na tok tenkyu long ol pipel bilong Australia long stap baksait long ragbi bikos em i bikpela spot."

"Nu Silan i bin winim dispela pilai bikos ol i bin kamap namba wan tim las yia.

"Mipela i bin salensim ol gut tru na mipela i kamap strong nau," Cheika i tok.



Ol foto: ABC



## Ol Australia sapota i no pilim gut

OL sapota bilong Australia Wallabies i ting olsem ol Australia bai win long Ragbi Wol Kap fainel, tasol ol Nu Silan All Blacks i daunim ol na ol i no pilim orait.

Ol sapota bilong Australia i bin go pas long ol pablik hap long Australia we ol i save i gat bikpela skrin long en long lukim fainel pilai i bin kamap long Twickenham, na i bin sapot olsem ol i stap klostu long pilai graun long Twickenham.

"Mi ting olsem 3-pela pilaia

bilong mipela long bek ro em ol strongpela man long go pas na tupela winga em ol strongpela man tu, na pilai bilong mipela bai kamap namba wan tru, tasol i no bin kamap olsem," Sapota bilong ol Australia, Daniel Meharg, i tok.

Ol sapota bilong Nu Silan, husat i bin stap long Australia i ting olsem Nu Silan bai win.

"Mi ting olsem ol All Blacks i gat moa strong na long kwata fainel em ol i bin win

na nau ol i gat moa strong long daunim ol Australia, na tru ol i bin mekim olsem," sapota bilong All Blacks, Mike Bentley i tok.

"Taim referi i bin pairapim wisil long pinis bilong pilai, mi no bin pilim gut, tasol ol All Blacks i bin mekim namba wan wok stret," sapota bilong ol Wallabies, Tim Roger i tok.

Ol sapota bilong Nu Silan i bin amamas nogut tru bikos tim bilong ol i brukim rekot we ol i bin winim 3-pela taitel pinis na i winim Wol Kap tu.

## Williams i bin kisim nupela medol



SENTA pilai bilong Nu Silan All Blacks, Sonny Bill Williams, i bin kisim nupela Wol Kap Medol bilong ol wina na i kisim ples bilong bipo medol em i bin givim long wampela yangpela boi husat i bin lukim pilai i stap.

Ol i bin givim dispela medol awod long London bihain long All blacks i bin daunim ol Australia Wallabies 34-17 long Twickenham.

William i bin givim bipo

medol bilong em long yangpela sapota, Charlie Lines, na taim All Blacks i bin win, Lines i bin ran i go long pilai graun na wampela sekyuriti gad i bin takelim em.

"Yangpela boi em i gat 7 o 8 krismas na em i bin kam long hap mipela i bin trening na sekyuriti gad i bin krosim em na mi pilim sori long em," Williams i tok.

"Mi bin givim medol long em mas mekim em long

tingim mi long nait we em i no bin hangamapim na em i bin holim na slip long nait."

Namba bilong medol ol All Blacks i bin kisim em 33.

Long wankain taim, Kapten bilong ol, Richie McCaw, na Kosa, Steve Hansen, i ken kisim nupela nem bihain long pinis bilong Wol Kap, tasol tupela bai kisim long taim tupela i pinis long wok tupela i mekim long Nu Silan ragbi.





## Pini i kisim ANOC prais

**NAMBA wan swima bilong Papua Niugini, Ryan Pini, i bin kisim 2015 Pasifik Gems prais bilong ol man etlit we Asosiesen bilong Nesanel Olimpik Komiti (ANOC) i bin givim.**

Ol i bin givim dispela awod bilong Pini long las wik long ANOC Jeneral Asembli long Washington D. C., Yunaitet-Stet bilong Amerika.

Pini i bin kisim awod bikos em i bin winim planti medol long Julai long taim bilong Pasifik Gem. Pini i bin winim 7-pela gol medol, tupela silva medol na tupela brons medol bilong PNG.

Dispela awod em i bin kisim i mekim Pini long kamap namba wan etlit bilong ol man long Pasifik Gem bilong dispela yia na strongim ples bilong em olsem em i wanpela strongpela pilaia.

"Mi amamas long kisim dispela awod na i tok tenkyu long ANOC long em i luksave long skil na strong mi i bin soim long taim bilong pilai," Pini i tok.

Pini i bin lusim pilai tasol taim Pasifik Gem i bin kamap long asples bilong em, PNG, em i kirap gen long karim nem bilong kantri bilong em na i bin go pas na kisim bikpela risal we PNG i kamap namba wan

long ol i bin winim planti medol.

Seketeri Jenerel bilong Papua Niugini Olimpik Komiti (PNGOC), Auvita Rapilla, i bin stap tu long dispela ANOC bung na i tok Pini i kisim dispela awod bikos em i bin givim planti taim long pilai.

Rapilla i tok dispela awod i no luksave long Pini tasol, nogat. Dispela awod i soim olsem PNG i orait long hostim wol klas pilai we em i ken kamapim ol wol klas pilaia olsem Pini.

Long dispela bung i kamap long USA, Pini i bin go olsem deleget na tu Deputi Sia bilong PNG Etlit Komisen.

Ryan Pini i bin tok tenkyu long Asosiesen bilong Nesanel Olimpik Komiti (ANOC) long em i bin luksave long pilai bilong em na i givim awod bilong ol Man Etlit.



## Klostu taim gavman bai baim olgeta ol wina bilong medol

**GAVMAN i baim pinis planti bilong ol etlit husat i bin winim ol medol long 2015 Pasifik Gem.**

Papua Niugini Olimpik Komiti (PNGOC) i bin kisim pinis ol mani we gavman bilong PNG i bin givim. Dispela mani em bilong baim ol PNG pilai husat i bin win na ol pilaia husat i no win tu bai kisim long mak bilong ol tu.

Gavman i bin givim dispela mani i go long PNGOC long mun Septemba na ol i stat baim ol etlit i kam inap nau na ol i baim ol tu stap.

PNGOC i bin putim tok-save pinis wantaim ol nius lain na ol spot ol i bin pilai

long en long givim ol benk akaun bilong ol long ol bai putim mani bilong ol.

Liklik lain etlit tasol i no bin givim benk akaun bilong ol na mani bilong ol i stap yet wantaim PNGOC.

PNGOC i baim ol etlit olsem gavman i bin mekim promis bipo long pilai i stat. Antap long dispela, ol i baim ol pilaia husat i no bin win tu, bikos ol i traim hat tu long winim medol long nem bilong kantri.

Gavman i bin tokaut pinis bipo long pilai olsem dispela mani gavman i bin putim em bilong strongim ol pilaia na mekim Tim PNG i kamap namba wan long bung

namba bilong ol medol.

Tru dispela tingting bilong gavman i bin karim kaikai we PNG i kamap namba wan.

PNGOC i amamas long harim olsem ol etlit i yusim dispela mani bilong ol long fomim spot klap bilong ol yet em bai gutpela moa, na tu sapos ol i givim dispela mani i go bek long ol spot na komyuniti bai orait.

PNGOC na ol etlit bilong Tim PNG i tok tenkyu long gavman i bin kamap wantaim dispela kain tingting long strongim na sapotim spot, na i bin skelim dispela mani long olgeta pilaia husat i bin pilai long 2015

## PNGOC i stap long ANOC Jenerel Asembli

**PAPUA Niugini Olimpik Komiti (PNGOC) i bin stap wantaim long Jenerel Asembli bilong Asosiesen bilong Nesanel Olimpik Komiti (ANOC) we ol i bin bung long Oktoba 20 inap 30 long Washington D.C., Yunaitet Stet bilong Amerika.**

Dispela em i bikpela ANOC Jenerel Asembli bung ol i bin holim we dispela kain bung i no save kamap bipo.

I bin gat 1000 manmeri i go long dispela bung aninit long 2016 Nesanel Olimpik Komiti na mausman bilong 20 In-

tanesenel Federesen na Ogenaising Komiti bilong ol pilai bai kamap long ol yia i kam.

Mausman bilong PNGOC em Presiden, Sir John Dawanincure, Meri Vais Presiden, Emma Waiwai, Seketeri Jenerel, Auvita Rapilla, Siameri bilong PNG Etlit Komisen, Karo Lelai, na Swima, Ryan Pini.

Sir John na Misis Lelai i bin go long dispela bung olsem tupela opisal bilong PNG Nesanel Olimpik Komiti deleget. Osenia Nesanel Olimpik

Komiti (ONOC) i bin makim Misis Waiwai long go long bung olsem mausmeri bilong Osenia Meri na Spot, na Misis Rapilla i bin go long dispela bung olsem Eksekutiv Memba bilong ANOC Eksekutiv.

Long wankain taim, ol i bin bungim Sir John olsem memba bilong ANOC Marketing na tupela Fainens Komisen.

ANOC Jenerel Asembli em i bikpela iven bilong Olimpik Muvmen, tasol i no long ol Olimpik Gem.

## Gavman i putim K45 milien bilong spot

**NESENEL Gavman i putim K45 milien bilong spot long 2016 baset.**

Seketeri bilong Nesanel Plening na Monitaring, Hakaua Harry, i tok dispela mani bai kam aninit long Papua Niugini Spot Faundesen.

Em i tok moa olsem dispela mani i mak long ranim intanesenel inven bai kamap long PNG olsem 2016 FIFA anda 20 Wol Kap

bilong ol meri na 2017 Ragbi Lig Wol Kap.

"Mipela i lukluk tu long strongim spot long mentenim ol spot fesiliti na strongim ol etlit bilong yumi long stap gut," Harry i tok.

Em i tok moa olsem sampela spot fesiliti ol i wokim bilong Pasifik Gems em ol i no pinisim yet na ol bai yusim dispela mani long pinisim ol dispela spot fesiliti tu.



**Piksa i soim namba wan stej bilong Sir Hubert Murray pilai graun. Dispela pilai graun em ol i bin mekim bipo long 2015 Pasifik Gem i kamap, tasol ol i no pinisim na nau ol i wok yet long pinisim dispela pilai graun. Ol bai pinisim dispela wok bipo long 2016 FIFA anda 20 Wol Kap bilong ol meri bai kamap.**

## Trukai Industries i skruim tupela yia moa long sponsa ol Not Kwinslan Cowboys

**i kam long bek pes**

"Mipela i gat plen long kirapim wanpela hap bilong ol Cowboys sapota hia long PNG wantaim membasip plen bilong PNG.

"Mipela i laik kirapim gutpela gem long PNG we sampela gutpela sosel risal bai kamap," Mitchel i tok.

Long wankain taim, Tate i bin tok olsem PNG i gat planti sans long go insait long NRL.

"OI NRL pilaia olsem Ray Tompson na James Segeyaro em tupela namba wan eksampel bilong ol pilaia we PNG i save lainim ol long pilai," Tate i tok.

"PNG i gat ol strongpela pilaia. Mi bin pilai egensim ol PNG Kumuls na mi bin pilim olsem ol PNG i save pilai tru ragbi, bikos bihain long pilai mi bin pilim sampela kain strongpela pen," em i tok.

Tate i bin tok moa olsem PNG Hunters i bin go long fainel long dispela sisen long Intras Supa Kap, i soim olsem ragbi lig i kamap bikpela pinis long PNG.

"PNG i stap klostu long kamapim wanpela tim long NRL, tasol ol bai pilai yet long Intras Supa Kap na dispela bai redim wanpela rot bilong ol long ol bai kirapim ragbi lig i go bikpela moa yet na kisim

planti pilaia long pilai long NRL," Tate i tok.

Em i bin toktok moa taim ol i bin kisim Tropi i go ran long ol bikpela soping senta insait long Mosbi olsem Visen Siti, Stop N Sop long Waigani Sentrel na Water Front long las wik Sarere.

"OI Not Kwinslan i bin winim 2015 NRL Premiasip Tropi em ol i bin win long nem bilong ol sapota na pipel bilong PNG tu."

Plantim manmeri i bin kam insait long harim Tate i toktok na kisim poto bilong tropi.

Pablik manmeri i bin i gat sans na ol i bin askim planti kwesten, na Tate na Mitchell i bin bekim ol askim bilong ol manmeri long dispela taim.

"Mipela i gat bikpela rispek long PNG, bikos mi no bin lukim dispela kain pasin long ol narapela kantri olsem PNG i gat bel hangre long kamapim ragbi lig long kantri," Tate i tok.

"Dispela em i namba wan taim mipela i winim dispela tropi insait long 20 yia na em i namba wan taim tu long NRL Primi- asip tropi i kam long PNG."

"Tropi em bilong ol PNG na Not Kwinslan wantaim," Mitchell i tok.

# Bai 150 lain i boksen long Kavieng

**LONG Nesenel Boksen sempionsip long Kavieng, Nu Ailan, i gat 150 pilaia bai resis long pinis bilong dispela mun.**

Ol lain husait bai pait bai kam aninit long 23 boksen asosiesen insait long kantri na ol dispela boksen asosiesen i redi pinis long salim pilaia bilong ol.

Dispela sempionsip pilai bai kamap long 26 Novemba inap 29 na ol bai pilai long Peter Torot senta long Kavieng taun.

Dispela em i namba wan taim long boksen sempionsip i kamap long Kavieng.

I gat moa long 50 opisal bilong ol asosiesen bai go long Kavieng long taim bilong pilai.

Presiden bilong Papua Niugini Boksen Yunien, John Avira, i tok olsem i gat 10-pela divisen bilong ol man em i mak long 49kg inap long 91kg na moa, na 5-pela

divisen bilong ol meri em i mak long 48kg inap long 75kg.

Em i tok moa olsem sampela asosiesen i bin no givim nem bilong ol pilaia yet.

"Mi laikim ol dispela asosiesen long givim nem na wokim rejista kwik taim bipo long taim bilong pasim rejistresen, Novemba 9," Avira i tok.

Tasol, long Novemba 1, NCD Amateur Boksing Asosiesen i kamapim namba tu hap bilong boksen resis long eria bilong Depyuti Siti Menesa bilong NCD, Honk Kiap, na em i Presiden bilong dispela boksen asosiesen tu.

Dispela resis i bin soim olsem 9-pela Asosiesen insait long NCD i bin kam wantaim ol boksa o pilaia bilong ol long kedet level, senia na ol nupela pilaia.

Vais Presiden bilong Asosiesen, Wilfred Mai, i tok dispela sisen resis i kamap tu

long mekim seleksen bilong go pait long Nesenel Boksen Sempionsip long Kavieng.

Ol bai selektim ol boksa moa long 28 inap 30 boksa aninit long man na meri divisen long olgeta kategori bai kamap long sempionsip pilai.

Liklik namba bilong senia boksa i redi pinis long go pait long Kavieng bikos ol i bin win aninit long wan wan kategori bilong ol.

Mai i bin tok moa olsem planti boksa bilong ol i mekim trening bilong ol yet na i stap long gutpela mak na i redi long pait egensim taitel bilong ol.

Tasol, nau ol i no gat taim long pain spona long helpim ol long trenspot bikos tiket mani long go long Kavieng em i antap tumas.

Ol i weitim opisal spona bilong ol, Kana Construction Limited, bikos em i no mekim wanpela toktok yet.

Boksen i bin kamap navel long tupela man aninit long man divisen long NCD Amateur Boksen Asosiesen long las wik Sande, long eria bilong Asosiesen Presiden, Honk Kiap.



# Resis long ran na swim



Ol lain i harim ol tok save bipo long ol i statim resis bilong ol.



Wanpela yangpela i swim na i kam klostu long pinis bilong resis.

# TNSL franchise klap i redi long statim pilai

Telikom Nesenel Soka Lig (TNSL) bai kamap long 2015 inap 2016 i redim pinis 12 franchise klap husat bai pilai na ol i baim pinis K40, 000 nominesen fi bilong ol.

Edministreta bilong kompetisin, Simon Koima, i tokaut olsem olgeta klap i bin baim pinis olgeta nominesen fi bilong ol, bihainim pinis de we ol i bin makim, Sarere Oktoba 31.

Koima i tok i gat wanpela o tupela tim i kisim planti taim liklik, tasol i luk olsem ol bai baim fi bilong ol long dispela wik.

Long las wiken, Koima i bin stap long Lae long Besta FA Kap na i bin kisim tok save olsem ol klap long Lae olsem Lae Siti Dwellers, Besta PNG Yunaitet na Goroka FC i bin baim fi bilong ol long dispela taim.

Dispela wik ol i printim ol logo antap long ol yunifom aninit long wan wan spona.

Ol bai pinisim ol dro bilong pilai long dispela wik na bai givim long NSL Bod long tok orait bipo long ol bai givim long wan wan taim, pablik na ol nius lain.

Pilai bai stat long Novemba 15.



Ol tupela yangpela husat i win long seksen bilong ol long resis insait long akuathon long las wik Sande long NCD, i redi long kisim prais bilong ol i kam long Stepen Damien bilong PNG Triathlon Association.

**40% Specials** available on selected routes

Reservations – Toll Free: 1800 5465, Email: sales.linkpng@airniugini.com.pg  
 Find us on Facebook: www.facebook.com/linkpng  
 Online sales: www.airniugini.com.pg

**LinkPNG**

**1<sup>st</sup> year Anniversary SPECIAL!**



**HOLIM MI:** Pilaia bilong Hohola Flais i ranawe long pilai bilong Sauts long wiken semi fainel bilong Pot Mosbi ragbi lig. Sauts i win na bai go insait long narapela fainal gen long wik i kam.



**KIKIM BIKPELA:** Namba 7 bilong Sauts i mekim bikpela kik go daun long sait bilong Flais. Em bin staim gem bilong Sauts na kisim Men Ov Da Mets.




**KGB EM MIPELA YA:** Tim KGB bilong Barakau ragbi i soim nupela yunifom bilong ol.



**TRAIM MI:** Tuvi Daniel bilong KGB i traim bun bilong em taim em ran go long banis bilong narapela tim.



**MI MEMBA BILONG COWBOYS:** Wanpela memba bilong Not Kwinslen Cowboys i soim memba kat bilong em wantaim ol opisel bilong Cowboys na bosman bilong Trukai.



**IMPROVED TASTE!** Niupela teist wantaim planti mit na oil. Teistim na bai yu laikim moa yet.

# DIANA

Tuna



Emi tuna  
bilong PNG



Manufactured by



RD Tuna Canners Ltd.

Moa mit na  
oil insait



TUNA IN OIL

# Trukai Industries bai sponsa ol Cowboys yet



KISIM POTO: Brent Tate bilong Not Kwinnsen Cowboys i apim tropi bilong NRL go antap long ol fens bilong Cowboys long lukim na kisim piksa taim tropi kam raun long Pot Mosbi. Poto Nicky Bernard.

### Philemon Tame i raitim

TRUKAI Industries i bin stat sponsa ol Not Kwinnsen Cowboys long yia 2008 na nau em i skruim tupela yia moa long sponsa ol Cowboys.

Dispela sponsa Trukai i bin mekim em i bilong soim Cowboys olsem PNG em i wanpela kantri i save laikim ragbi lig moa olsem nesanel spot bilong en.

Ol Trukai lain i bin mekim dispela tok save long las wik Fraide bihain long 2015 Nesanel Ragbi Lig (NRL) Primiasip Tropi i bin kam long Papua Niugini we namba wan na bipo pilaia bilong ol Cowboys, Brent Tate, i bin go pas long dispela wokabout bilong ol.

Jenerel Menesa bilong Sels na Maketing bilong Trukai, Andrew Daubney, i tok Trukai i amamas long kamap poro bilong Cowboys na patnasp bilong tupela bai go

het long kirapim Ragbi Lig i kamap bikpela long PNG.

Trukai em i wanpela amamas sponsa bilong Cowboys na taim ol i bin pilai gren fainel, liklik wok-lain bilong Trukai i bin go long lukim pilai long Oktoba 4.

Trukai i bin tok tenkyu long NRL Primiasip Tropi i bin kamap long Pot Mosbi long Oktoba 29 na i tok olsem kam bilong ol i bin kirapim tingting bilong ol sapota bilong Cowboys na ol ragbi lig insait long PNG.

Cowboys Jenerel Menesa bilong Komesel, Steve Mitchell, i tok ol Cowboys i laikim olsem Ragbi Lig i mas gro bikpela long PNG.

"Mipela i bin amamas long kam long PNG bikos mipela i gat bikpela sapot long hia na ol i save gat bikpela hangre long ragbi," Mitchel i tok.

...lukim moa long pes 25



Available as:

Delivery van  
15 seater  
16 seater

Ready to power up your business ?  
The all-new NV350 Urvan delivers with style.

- Powerful 95kw diesel engine
- Folding aisle seats
- Large sliding door
- CD player
- Full air conditioning
- Stylish slide window



Photo for illustration purpose only



MEMBER

**BOROKO**  
MOTORS

Port Moresby 325 5255 Lae 472 1144 Madang 422 2659 Mt Hagen 542 1933 Goroka 532 3552 Kimbe 983 5035 Kokopo 982 8193 Tabubil 649 9048  
Email: info@borokomotors.com.pg | Web: www.borokomotors.com.pg